

## **Valeya Iwakana Malika Givetokilumina**

### *Kivemala*

Malika anayegana anavelu ani Iyoni Malika, ada yana melala Yelusalema. Banae keke afositolo kadu Yeisu yana tova babiya Malika keke yana yoo nodi ida nunudadana, e ada Yeisu yana ifufu ke yana vewala keke gida nogali Yeisu Tauna awane. Aku aimo Yeisu gilaka gabameya muline, Malika givebutu ke Yeisu yana tonogalayavo nodi iluluveyau e ada afositolo adiselu Paulo ke Pita gialamanedi ke gilemedi yadi faisewa wagaine. Ada Pita yana ifufu Yeisu faine ani Malika ginogalina ke givetokilumina.

Taidei Malika yana vetokilumina-nai wagaine yana nuwanuwa lakaina ani Bana Yeisu Keliso ani Yaubada Natuna. Taide nuwanuwa-nai lakaina ani Yaubada giawamogatalena Yeisu yana babitaiso wagaine (1:11). Ada aluwaluwa koyodi Yeisu ani Bana Yaubada Natuna iinainanana (3:11 ke 5:7). Yaubada kaduwe giawamogatalena oya lakaina wagaine Yeisu anaita gisivedavedama anatoveya (9:7). Ada Yeisu yana vona matalivulivuna wagaidiya taide nuwanuwa-nai givevewalena (12:1-12) ada giawamogatalena tunutunugina (14:61-62). Ada kaduwe tolugaviya aditonagona Yeisu anakelose walilivane gimidimididi aku giawamogatala, givonaga, “Vona velemono, taidei Banae Yaubada Natuna!” (15:39). Ada

Malika yana nunu ani kaliva gina ivenuwanuwadi e ada valeya iwakana ina nogalina ke yadi dewa koyodi wagaidiya ina nuwawilana ada Yeisu Keliso Banae Yaubada Natuna ina vetumaganena.

*Iyoni Tobabitaizo wai gikidewedewena Yeisu yana ela faina.*

*Mad 3:1-12; Luk 3:1-18; Iyo 1:19-34*

<sup>1</sup> Yeisu Keliso Banae Yaubada Natuna anavaleya iwakana anaebavevuvu ani taidei anafaiweya.

<sup>2</sup> Tuwai-moena falofita Aiseya giifufuyena yana buki wagaine, givona,

“Una nogalina. Yaku tomatawa gana imili wai gina nagona  
ke ya wai kaliva aseasediya  
gina kidewedewena.”†

<sup>3</sup> Fafali kavovona wagaine gina vedovedou,  
‘KAUVEYA yana wai aseasemiya  
wana kidewedewena  
ke wana kivetunutunugina Bana faine.’ ” †

<sup>4</sup> Ada Iyoni giyegemona\*\* ke gilulumamala fafali kavovona wagaine ada kaliva gikikivebabitaisodi, nuwawilana anaiyaiyaya faina. Ada givonavonaga, “Yami dewa koyona wagaidiya wana nuwawilana ke wana babitaizo e ada Yaubada yami koyona gina venuwaegedi.”†

---

† 1:2 Mal 3:1 † 1:3 Ais 40:3 \*\* 1:4 Yaubada yana tomatawanai falofita Aiseya gifalofisaiyena ani Iyoni Tobabitaizo. (Mad 3:1-2, Luk 3:3) † 1:4 Luk 1:77

<sup>5</sup> Ada kaliva moyaidi ielaelai bana wagaine, Yudiya anafafali wagaine kaduwe meYelusalema ielai Iyoni yana laumamala ina nogala faina. Ada yadi dewa koyodi iawaawamogataledi, ada Iyoni gikivebabitaishodi gufa Yolidani wagaine.

<sup>6</sup> Aku banae Iyoni ananuya ani kevakeva kameli vutuvutuna wagaine ibubuna, aku anabeleta labene giyogona ani kevakeva kwafilina wagaine. Aku anaga ani bilolo ke mawa vutona.

<sup>7</sup> Ada giawamogatala kaliva wagaidiya, givonaga, “Kaliva seyana mulikuya gielaelai ani Banae lakai-moena, aku Iyayeku kwamana kabisoku. E ada keke akulauboda Bana wagaine gana vetogugai ke gana iboula ada anaageyafayafa anabulava gana kiyavu.

<sup>8</sup> Iya gufa wagaine gakivebabitaishomi aku Banae, ani Aluwaluwa Tabuna wagaine gina kivebabitaishomi.”†

*Iyoni Yeisu gikivebabitaishona.*

*Mad 3:13-17; Luk 3:21-22; Iyo 1:32-34*

<sup>9</sup> Aku tova-nai wagaine Yeisu gielai Nasaledi-deya Galili anafafali wagaine, ada Iyoni gikivebabitaishona gufa Yolidani wagaine.

<sup>10</sup> Ada Yeisu gifumatana gufa wagaine ani maduga-mowa giitalaka giitana gabama giawaina aku Aluwaluwa Tabuna giobuobelai Bana wagaine vaita manuga bunebune anafaiweya.†

---

† 1:8 Gug 1:5 † 1:10 Iyo 1:32

<sup>11</sup> Ada gabameya-deya Yaubada bonana giyege-mona, givona, “Oyeni Natu aseaseku. Nuwaku ukivemwamwalina lakaina.”†

*Seitani Yeisu gialadibidibiyena.*

*Mad 4:1-11; Luk 4:1-13*

<sup>12</sup> Ada maduga-mowa Yaubada Aluwaluwana Yeisu giimilina ada ginau fafali kavovona wagaine.

<sup>13</sup> Ada yadayada foti (40) wagaidiya fafalinai wagaine gimiyamiya aku Seitani\*\* gialaaladibidibiyena.† Ada kevakeva walawala nodi imiyamiya aku aneloseyavo iela ilemelemena.

*Yeisu yana faisewa givevuvu Galili anafafali wagaine.*

*Mad 4:12-17,23-24; Luk 4:14-15*

<sup>14</sup> Tova-nai Kini Elodi giveimeya yana toveya, Iyoni ikiveyabina ke deli wagaine isena. Ada muliya Yeisu ginau Galili anafafali wagaine ada Yaubada anavaleya iwakana gilulumamalena,

<sup>15</sup> givona, “Tova-moena bademowa giyegemo! Yaubada yana ebaveimeya bademowa givelilivana. Yami dewa koyona wana dibusoyogedi ke wana nuwawilana, ada valeya iwakana wana vetumaganena.”†

*Yeisu yana tonogalayavo gimadudouwedi biyavo-dina.*

*Mad 4:18-22; Luk 5:1-11*

---

† 1:11 Sam 2:7, Mak 9:7

\*\*

1:13 Yegana-nai ‘Seitani’ ani meIsileli bonadi iwewagana Ibeliu wagaine, ada ananuwanuwa ani ‘toveloi-kavokavovo’. † 1:13 Ibel 4:15 † 1:15 Mad 3:2

<sup>16</sup> Ada tova seyana Yeisu Lavu Galili taliyeya givetaliyabalabala aku Saimoni ke anatubuluga Andulu giitadi. Adiselu guvata iyavuyavulena lavu wagaine, faina badi toyauba.

<sup>17</sup> Ada Yeisu givonedi, givona, “Wanaela wana muliyeku ada gana kidewedewemi ke imi kaliva aditoyauba.”

<sup>18</sup> Ada maduga-mowa adiselu yadi guvata imadusegedi aku Yeisu imuliyena.†

<sup>19</sup> Kaduwe maita-moena ginau ada kaliva adiselu giitadi, tainei Iyemesa ke Iyoni, badi Sebedi natunavo. Waka wagaine yadi guvata ikidewadewa.

<sup>20</sup> Ada maduga-mowa gidouwedi ke ina muliyena, ada tamadi yana togugaiyavo nodi waka wagaine isegedi aku imuliyena.

*Yeisu aluwaluwa bwanebwanenena giveyege-monina.*

*Luk 4:31-37*

<sup>21</sup> Yeisu yana tonogalayavo nodi inau melala anayegana Kafaneumi wagaine, ada Sabate wagaine Yeisu giluku manawa ebavewala wagaine ke givebutu givewala.

<sup>22</sup> Aku kaliva moyaidi inogalina ani meyadi gisidobodobona yana vewala-nai wagaine. Faina keke Mosese yana veimeya anatovewalayavo anafaiweya gida vewala, aku vaita kaliva seyana wa yana veimeya anafaiweya givewavewala.†

<sup>23</sup> Aku yadi manawa ebavewala-nai wagaine kaliva seyana aluwaluwa bwanebwanenena nafone ani givedou bonana lakaina, givona,

---

† 1:18 Mad 19:27    † 1:22 Mad 7:28-29

24 “Aa! Yeisu kwana Nasaledi, gavana nuwanuwa unagai wagaimeya? Gavaiyamu, uelai una luyavulema faina? Iya gaalamaneni o gavakaliva. Oyeni Yaubada yana Kaliva Tabutabuna!” †

25 Aku Yeisu aluwaluwa bwanebwanenena giawatana, givona, “Gina kuluni, ada una yegemona kaliva-nai wagaine!”

26 Ada aluwaluwa bwanebwanenena kaliva gigai givetatava lakaina aku gikwekwela moiyalina, ada muliya kaliva-nai nafone giyegemona.

27 Ada kaliva moyaidi meyadi gibovu ke taudiyavo ivetolitoli, ivonaga, “Ida gavana? Yana vewala evaguna kadu wa anaveimeya toyogina! Au aluwaluwa bwanebwanenedi nonogana giveimeyedi ada yana veimeya imatawalewaleyena.”

28 Ada Yeisu valeyana maduga-mowa iifufuyedadanena Galili yana ebaveimeya matatabuna wagaine.

*Yezu kaliva moyaidi gikivebwainidi.*

*Mad 8:14-17; Luk 4:38-41*

29 Yeisu manawa ebavewala wagaine giyege-mona ada Iyemesa ke Iyoni nodi inau Saimoni ke Andulu yadi manuweya.

30 Aku Saimoni lawana vavine ani iveoga. Vovodi gilukalalava lakaina ada iviya idaudau, ada Yeisu imadumatawena yadi veoga faina.

31 E ada ginau wagaidiya ke nimadi giabina ada gisivemidididi ani veoga-nai giavaina aku vovodi

---

† 1:24 Mak 5:7

gituluna. Ada ivebutu adiwakawaka adiga ikide-wadewa.

<sup>32</sup> Aku kauwana bademowa giolu ada lavilavinai wagaine kaliva moyaidi gavega wa adiveoga ke moyaidi nafodiya aluwaluwa koyona imiyamiya ani Yeisu wagaine tubuiyadiyavo ialiyedi.<sup>†</sup>

<sup>33</sup> Ada melala-nai anatomiya moyaidi ivagauta Saimoni yana manuwa-nai awane imididi,

<sup>34</sup> ada kaliva moyaidi wa adiveoga tulina tulina ani Yeisu gikivebwainidi. Ada kaduwe aluwaluwa koyona kaliva nafodiya giveyegemonidi, aku aluwaluwa-dina giawatadi ada keke gida awaegedi ina ifufu, faina ialamanena Banae Tauna au Mesaiya.<sup>†</sup>

*Yeisu giveoveola fafali mamaveya ada gina gilulumamala Galili anafafali wagaine.*

*Luk 4:42-44*

<sup>35</sup> Aku yadayada anavelu mala aimo keke gidalavu aku Yeisu gimididi ke manuwa gisegena aku ginau mamaveya mwatugu-kavovona wagaine ada giveoveola.<sup>†</sup>

<sup>36</sup> Aku Saimoni tubuiyanavo nodi inau ke Yeisu ilelena,

<sup>37</sup> ada inuwagana wagaine ivonena, ivonaga, “Kaliva moyaidi ileleleni.”

<sup>38</sup> Yeisu givona, “Kananau melala lilivadeya ke badi kaduwe wagaidiya gana lulumamala. Taide vuvuna-nai faina Iya gaelai.”

<sup>39</sup> Ada Yeisu gibalawalilivuga Galili anafafali matatabuna wagaine, ada meIsileli yadi manuwa

---

<sup>†</sup> 1:32 Mad 4:24    <sup>†</sup> 1:34 Mak 3:11-12    <sup>†</sup> 1:35 Mad 14:23, Luk 5:16

ebavewala wagaidiya gilulumamala ke kaduwe aluwaluwa koyodi giveveyegemonidi kaliva wagaidiya.<sup>†</sup>

*Yeisu tolefelo gikiveiwakanena.*

*Mad 8:1-4; Luk 5:12-16*

<sup>40</sup> Aku kaliva seyana banae vovona lefelo gikivekoyona ani gielai Yeisu wagaine ada tugana givetodonena aku giveolena toyogina, givona, “Gaalamanena O afaiweya una kiveyegayeganeke. E ada kai nuwanuwa aga uda gugaiyena.”

<sup>41</sup> Ada Yeisu ginuwakalikaliyena ke nimana gisena kaliva-nai wagaine aku givonena, “Ika, nuwanuwaku. Una yegayegana.” \*\*

<sup>42</sup> Ada kaliva-nai analefelo maduga-mowa giavaina, e ada gibwaina ke giyegayegana.

<sup>43</sup> Ada Yeisu veimeya toyogina givelena,

<sup>44</sup> givonenaga, “Una nogalina. Keke tamo gaito una awatalatalaine, aku unanau Yaubada yana veyavo anatovegugai wagaine e ada gina itani vovo ani gibwaina. Ada ya yegayegana Yaubada matane faina ani una vebolavoi Mosese giveimeya

---

<sup>†</sup> **1:39** Mad 4:23-25, 9:35    \*\*    **1:41** MeIsileli yadi veimeya seyana wagaine tolefelo ani bwanebwanenedi Yaubada matane. Taidei faina tolefelo keke adiaawaega inaluku manuwu tabu aku adiloil gaga fafali seyana wagaine imiya. Ada kaduwe, kai tamo gaito nimana ginasena tolefelo wagaine, banae kaliva-nai kaduwe bwanebwanene Yaubada matane. Aku tova-nai Yeisu nimana gisena tolefelo-nai wagaine, Banae Tauna keke gida bwanene, aku au banae tolefelo-nai analefelo gikivebwainina ke tolefelo-nai giyegayegana Yaubada matane.

anafaiweya. E ada kaliva moyaidi ina alamanena o velemonoena bade uveiwaka.”†

<sup>45</sup> Aku kaliva-nai ginau ada valeya-nai gi-awamogatalena kaliva moyaidi wagaidiya, ada au valeyana giakwalelega.† E ada yoo lakai-moena aimo ina vagauta faina, Yeisu keke anafai-weya gina awakawaka melala wagaidiya aku ginau fafali mwatugu kavovodi wagaidiya. Aku kaliva melala tulina tulina wagaine ielaelai Bana wagaine.

## 2

*Yeisu kaliva vovona memeluyana gikiveiwakana.*

*Mad 9:1-8; Luk 5:17-26*

<sup>1</sup> Yadayada gavaiyei giavaidi, kaduwe Yeisu giyewa-vagilena Kafaneumi wagaine, ada kaliva ikaiyanogala vaita Yeisu kadu gimiyamiya yana manuweya.

<sup>2</sup> E ada yoo lakaina ivagauta ada waiyeda ke manuwa-moena ani keke tamo mwatugu gi-datufu. Ada Yeisu valeya iwakana gilulumalena wagaidiya

<sup>3</sup> aku kaliva adilaufuli ielai ani kaliva iwai ialiyena, banae vovona memeluyana.

<sup>4</sup> Ada vaita kaliva-nai ina lukuwena Yeisu wagaine aku keke adifata, faina yoo lakaina. E ada iwai ilakavena manuwa getane, ada manuwa getana anaseboda kabisona ikakidi ada awagane kaliva iseobuyena anavaya wagaine.

---

† 1:44 Vei 14:1-4    † 1:45 Mak 7:36

5 Ada Yeisu kaliva-dina yadi vetumagana gitana ke kaliva-nai wagaine givona, “Natuku, ya koyona bademowa gavenuwaegedi.”†

6 Aku veimeya anatovewalayavo tufodi nodi ivetovetoga aku taudiyavo nuwainagediya itolidadana, ivona,

7 “Gavana faina givonavona anafaiweya? Ida kaliva-nai Yaubada givona awadamanena! Keke seyana gaito anafata koyona gina venuwaegedi aku Yaubada anakaibe-mowa.” †

8 Aku maduga-mowa Yeisu aluwaluwane-deya yadi nuwanuwa gialamanena e ada givonedi, givona, “Gavaiyamu-yo taidei anafaiweya aseasemiya wanuwunuwa?

9 Gavavona meyameyagani-moena ganavone kaliva-nai vovona memeluyana wagaine, ganavona, ‘Ya koyona bademowa gavenuwaegedi,’ o kai ganavona, ‘Una mididi, avaya una waina ke una nudadana’?

10 Aku nuwanuwaku wana alamanena ani Banae Kaliva Natuna wa yana veimeya e ada Bana anafaiweya kaliva yadi koyona gina venuwaegedi babi taidei wagaine.” Ada au kaliva-nai vovona memeluyana ani Yeisu givonena,

11 “Iya gavoneni, una mididi, avaya una waina ada unanau ya manuweya.”

12 Au kaliva-nai gimididi, anavaya giwai-yo moyaidi matadiya giyegemona ginau.

E ada yoo-dina meyadi gisidobona ke Yaubada idavana ada ivona, “Keke seyana tova gugai taidei anafaiweya kadaita!”†

---

† 2:5 Luk 7:48    † 2:7 1Iyo 1:9, Ais 43:25    † 2:12 Mad 9:33

*Yeisu Livai gidouwena ke gina muliyena.*

*Mad 9:9-13; Luk 5:27-32*

<sup>13</sup> Kaduwe Yeisu giyewa-vagilena Lavu Galili taliyeya, aku yoo lakaina ivagauta wagaine ada givewaledi.

<sup>14</sup> Ada Yeisu fafali-nai gisegena aku gitauya ginaunau ani Alipiyo natuna Livai giitana. Banae takesi anatoyaudi ke yana takesi anavada wagaine givetovetoga. Ada Yeisu givonena, “Unaela una muliyeku.” Ada gimididi ke Yeisu gimuliyena.\*\*

<sup>15</sup> Ada muliya Yeisu ginau Livai yana manuwewa ada yana tonogalayavo nodi teibeli lilivane ienokekela ikanikani, aku badi takesi anatoyaudi ada kaduwe tokoyona moyaidi nodi, faina yoo lakaina imuliyena.

<sup>16</sup> Aku veimeya anatovewalayavo, badi Falisi adiyoo, ani iitana Yeisu takesi anatoyaudi ke tokoyona nodi ikanikani e ada yana tonogalayavo itolidadanedi, ivona, “Gavana faina takesi anatoyaudi ke tokoyona Banae badi nodi ikanikani?”†

<sup>17</sup> Aku Yeisu yadi tolidadana ginogalina-yo gilufata wagaidiya, givona, “Badi gavega iwakadiyavo ani keke nuwanuwadi doketa, aku badi toveoga gaga ani nuwanuwadi. Iya gaelai ani keke toyegayegana gana douwedi faina. Aiyada gaelai ke tokoyona gana douwedi.” †

*Kani anailova faina Yeisu itolidadanena.*

*Mad 9:14-15; Luk 5:33-35*

---

\*\* **2:14** Livai anayegana anavelu ani Madiu. (Mad 9:9) † **2:16**  
Mad 11:19, Luk 15:1-2 † **2:17** Luk 19:10, 1Tim 1:15

18 Aku aimo seyana tova Iyoni yana tonogalayavo ada Falisiyavo yadi tonogalayavo ani kani iloilovau. Ada kaliva tufodi ielai Yeisu wagaine ke itolidadanena, ivona, “Gavana vuvuna ayo Iyoni yana tonogalayavo ada Falisiyavo yadi tonogalayavo ani tova ke tova kani iloilova, aku ya tonogalayavo ani keke?”

19 Ada Yeisu givona matalivulivuna wagaidiya, givona, “Nagi anakani vemwamwala wagaine ani gavaiyamu, tonagi kaliva tubuiyanavo nodi ina miyamiya aku tubuiyanavo kani ina ilovau? Keke, faina tonagi-nai nodi imiyamiya.

20 Aku tova gielaelai wagaine, kaliva tufodi inaela tonagi kaliva ina vaina tubuiyanavo wagaidiya-deya ke ina nauwena. E ada yadayadadina wagaidiya kani ina iloilovau.”

*Yeisu yana vewala evaguna ani keke kaliva yadi nuwanuwa tuwaina nodi kana vetutamwata.*

*Mad 9:16-17; Luk 5:36-39*

21 Ada kaduwe givona matalivulivuna-vagila, givona, “Keke nuya tuwaina kana bwadi nuya diyana evaguna wagaine. Faina aimo nuya diyana evaguna ginabuta wagaine gina siyauta, e ada nuya tuwaina gina agigina lakai-moena.

22 Kaduwe anafaiweya, keke waini evaguna kana iwavedama tuwava kevakeva bubuna tuwaina wagaidiya. Faina waini evaguna yana lutuga wagaine tuwava bubu-dina gina fuwadi, e ada waini ke tuwava bubu inakoyo. Aku

analauboda waini evaguna kana iwana tuwava evaguna wagaidiya.” \*\*

*Yeisu Banae Sabate anatoveimeya.*

*Mad 12:1-8; Luk 6:1-5*

<sup>23</sup> Sabate seyana wagaine Yeisu yana tonogalayavo nodi witi anabakula wagaidiya inunugolota, aku tonogalayavo ivebutu witi guwana ikidakadaka.\*\*

<sup>24</sup> Aku badi Falisiyavo ani iitadi ada Yeisu ivonena, ivona, “Una itana. Gavana faina Sabate anaveimeya keke ida itaveyabi?”

<sup>25</sup> Bana givonedi, givonaga, “Aku maita waveyawanuwagana gavana Kini Deivida gigana tova-nai yana yooyavo nodi mafa gilavudi wagaine?”

<sup>26</sup> Giluku Yaubada yana manuwa wagaine ada beledi vevetabuna Yaubada matane isena, ani givai gikanina, ada kaduwe yana kalivayavo givedi ikani. Taine Yaubada yana veyavo anatovegugai aditonagona anayegana Ebayada yana tova wagaine. Aku beledi-nai ani wa anaveimeya

---

\*\* **2:22** Tova-nai goti ina mununa ada ina wekalina, ani waini anatuwava ina bubuna kwafilina matatabuna wagaine. Ada waini evaguna ina faisewana ada ina iwana tuwava-nai ke odona ina sifobodana. Ada aimo waini evaguna gina lutuga wagaine, tuwava evaguna ani iwakana. Keke gina sigigi aku anafata ginafata. Aku kai ida iwana tuwava bubuna bade givetuwai wagaine, wada keke iwakana, faina tuwava-nai bademowa ayayana e ada keke ginafata aku waini evaguna gina lutuga wagaine, tuwava tuwaina gina afuwana. \*\* **2:23** Tayuwe adigiduwa-nai ani kai witi ina kidakadaka aga wada keke kiyafu. Aku kai witi kwasikwasi wagaine ina talana, wada kiyafu. (2Vei 23:25)

vitana velemonoena, keke kaliva-kavokavovo inakani aku badi veyavo anatovegugai gaga adiawaega ke ina kanina.”†

27 Ada kaduwe Yeisu givonedi, “Yaubada keke kaliva gida bubudi Sabate† anaawata faina, aku aiyada Sabate gibubuna kaliva adilema faina.

28 Taidei faina Banae Kaliva Natuna ani Tauna Sabate anaKauveya.”

### 3

*Kaliva nimana memeluyana ani Yeisu gikiveiwakanena Sabate wagaine.*

*Mad 12:9-14; Luk 6:6-11*

1 Kaduwe tova seyana Yeisu giyewa manuwa ebavewala wagaine giluku. Aku manuwa-nai wagaine ani kaliva seyana gimiyamiya, nimana memeluyana.

2 Aku kaduwe kaliva tufodi imiyamiya, ani badi vuvu ilelelena ke Yeisu ina awavekoyoyena. E ada Bana iitaitavenanauna ke ina itana kai Sabate wagaine aku nimakoyo gina kivebwainina o kai keke.†

3 Ada Yeisu kaliva nimana koyona wagaine givonaga, “Unaelai idedeku.”

4 Ada kaliva wagaidiya givona, “Sabate faina, gavaiyamu Veimeya anabuki wagaine giveimeyeda? Kana gugai iwakana kaliva wagaine o kai kana gugai koyona wagaine? Kai kaliva kana kibababalena o kai kana luvealikana?” Taidei anafaiweya Yeisu gitolidadanedi aku badi iveyamata.

---

† 2:26 1Sam 21:1-6 † 2:27 2Vei 5:14 † 3:2 Luk 13:14

<sup>5</sup> Ada Yeisu wa yana nuwakoyo giitadadana moyaidi wagaidiya aku kadu wa yana nuwavita nodi yadi debai toyoga faina, aku givona nimakoyo wagaine, givonaga, “Nima una sivetotona.” Ada kaliva-nai nimana gisivetotona ada au giveiwaka-yabu.

<sup>6</sup> Aku badi Falisiyavo itauya inau Elodi yana yoo nodi ivagauta ada iveifuifufuyena gavaiyamu Yeisu ina luvealika.\*\*

*Kaliva ivagauta Yeisu wagaine Lavu Galili taliyeya.*

<sup>7</sup> Aku Yeisu yana tonogalayavo nodi iyegemona ada inau Lavu Galili taliya wagaine aku yoo lakai-moena imuliyedi. Badiyavo ielai Galili ke Yudiya wagaidiya,

<sup>8</sup> kaduwe Yelusalema ke Idumea, ada gufa Yolidani fafaline, ada kaduwe Taiya ke Saidoni. Yoo-dina gavana gigugaiyena inogalina faina ada ielai wagaine.

<sup>9</sup> Ada yoo lakai-moena faina, Yeisu yana tonogalayavo givonedi waka ina kidewedewena Bana faine, faina yoo lakai-moena aimo ina tutuwaiwainena.†

<sup>10</sup> Kaliva moyaidi gikiveiwakanedi faina, toveoga ififina ada ivetoefaefa ke Bana wagaine nimadididi inasedi e ada ina veiwaka.

---

\*\* **3:6** Falisiyavo inuwanuwa vaita kai kaliva ina kiveiwakanena Sabate wagaine ani wada faisewa, ada yadi awata seyana ani kaliva keke ina fafaisewa Sabate wagaine. Aku Yeisu toveoga gikivebwainidi Sabate wagaine. Ada taidei yana dewa-nai ani Falisiyavo agodi giveugana e ada wai ilelele ke Yeisu ina luvealikana. (Iyo 5:16-18, Mad 22:15-16) † **3:9** Mak 4:1, Luk 5:1-3

11 Ada gavatoveya badi wa aluwaluwa bwanebwanebani Yeisu inaita-moena ani aluwaluwa-dina nafodiya inagadi ke, wa yadi vetatava tugadi ina vetovetodonedo Yeisu debaine ada ina vedovedou, “Oyeni ani Yaubada Natuna!”

12 Aku Yeisu giawatadi toyogina evona keke valeyana ina ifufuyedadane e ada kaliva ina alamane Banae gaito.

*Yeisu afositolo adituwelo givenuwadadanedi.*

*Mad 10:1-4; Luk 6:12-16*

13 Ada Yeisu gilaka oya wagaine aku kaliva-dina nuwanuwana ani gidouwedi ada ilaka Bana wagaine.

14 Ada kaliva adituwelo givenuwadadanedi ada givewagadi ‘afositolo’. Givenuwadadanedi e ada badi Banae nodi ina miyamiya ke gina imilidi ina lumamala,

15 ada veimeya gina veledi e ada wa yadi veimeya aluwaluwa koyodi ina veyegemonidi.†

16 Ada kaliva-dina givenuwadadanedi ani adiyegana taidei anafaiweya. Saimoni aku anayegana Yeisu givewagana ani Pita,

17 Iyemesa ke taina Iyoni adiselu Sebedi natunavo aku Yeisu givewagadi ‘Bowanedisi’, anakivila ani ‘Atala Natunavo’, \*\*

18 kaduwe Andulu ke Filipi ke Batolomiu ke Madiu ke Tomasi ada Iyemesa banae Alifiyo natuna, Tadiyasi ke Saimoni Seloti,

19 ada Yudasa Isakaliyota, bana Yeisu gina atuegena nibainavo nimadiya.

---

† 3:15 Luk 9:1    \*\* 3:17 Yegana-nai ‘Bowanedisi’ ani vona Giliki.  
(Luk 9:54)

*Tufodi ivona vaita Biyelisibuli Yeisu givemagana.*

*Mad 12:22-37; Luk 11:14-23*

<sup>20</sup> Ada bademowa Yeisu yana yoo nodi iyewa manuwa seyana wagaine, aku kaduwe yoo lakaina ivagauta ada Yeisu ke yana tonogalayavo nodi keke tamo mwatugu ayo inakani.<sup>†</sup>

<sup>21</sup> Ada yana gabuyavo inogalina Yeisu keke gida veyaveyawai e ada inau ina vagaulena, faina ivona, “Givekabakabaleya.”

<sup>22</sup> Ada veimeya anatovewalayavo Yelusalema-deya iobuelai, ani ivonaga, “Kaliva taidei ani Biyelisibuli\*\* nafone gimiyamiya.” Ada kaduwe ivona, “Banae aluwaluwa koyodi aditonagona yana toyogina wagaine aluwaluwa koyodi giveveyegemonidi.”<sup>†</sup>

<sup>23</sup> Ada taidei anafaiweya ivonavona faina, Yeisu gidouwe vagauwidi ke vona matalivulivuna wagaidiya giifuifufuyedi, givona, “Gavaiyamu, meyameyaganina Seitani tauna gina veyegemonina? Keke-mowa.

<sup>24</sup> Kai ebaveimeya seyana aku anayoo taudiyavo ina ludakadi e ada yoo tulina tulina nodi ina lulugaviya, aga ebaveimeya-nai ginabeu.

<sup>25</sup> Kaduwe kai unuma seyana aku anakalivayavo taudiyavo ina ludakadi ke nodi ina lulugaviya, aga unuma-nai ginabeu.

<sup>26</sup> Kaduwe anafaiweya, kai Seitani tauna yana yoo gina venibainena e ada

---

<sup>†</sup> 3:20 Mak 6:31      \*\* 3:22 Yegana-nai Biyelisibuli ani tuwai--moena yoo tufodi kadu ivegugaiyena Seitani faine. (Mad 10:25 ke anaailabama adiebakivemala)      <sup>†</sup> 3:22 Mad 9:34

yana ebaveimeya gina ludakana, aga keke meyameyaganina gina mididi aku au anaebalauyabu gina nuwagana.

27 Kai kaliva totoyogina yana manuweya gina miyamiya, aga keke tamo gaito anafaiweya ginaluku kaliva yana lokoloko ginavai. Aku kai nagona kaliva-nai totoyogina gina yogona aga muliya yana lokoloko gina vaidi.

28 Gavonemi velemono, kaliva yadi dewa koyodi moyaidi ani Yaubada anafaiweya gina venuwaegedi, ada kaduwe gavavona wagaine inavona awadama ana anafaiweya gina venuwaegedi.

29 Aku Aluwaluwa Tabuna ani badi gavega Banae inavona awadama ana, tainei yadi koyona ani keke-mowa Yaubada gina venuwaege. Koyona-nai aimo ginamiya-vagata wagaidiya.”†

30 Vona taidei Yeisu giinanana faina kaliva tufodi ivona, “Banae ani aluwaluwa bwanebwane-nena gimiyamiya nafone.” \*\*

*Yeisu inana ke tainavo ielai.*

*Mad 12:46-50; Luk 8:19-21*

31 Aku Yeisu inana ke tainavo† ani ielai ada wamelaleya imidimididi, aku kaliva seyana ivonena ke Yeisu gina matawena.

32 Ada yoo lilivane ivetovetoga ani Yeisu imatawena, ivonaga, “Kauveya, ina

---

† 3:29 Luk 12:10    \*\* 3:30 Yeisu iyaiyaya toyogidi gigugaiyedi Aluwaluwa Tabuna yana toyogineya, ani Yaubada Aluwaluwana. Aku kai seyana kaliva ginavona vaita Seitani o kai aluwaluwa koyona yana toyogina wagaine Yeisu gigugai, wada kaliva-nai Aluwaluwa Tabuna giawavekoyoyena.    † 3:31 Mak 6:3

ke tubuiyamomo waiyedeya imidimididi. Nuwanuwadi ina itani.”

<sup>33</sup> Ada Yeisu givona wagaidiya, givona, “Gaito inaku? Ada gavega kaikuweyavo?”

<sup>34</sup> Aku badi itogafifina ani giitafasedi ada givona, “Taidei yoo-dina badi inaku ke kaikuweyavo.

<sup>35</sup> Faina badi gavega Yaubada yana nuwanuwa ivevegugaiyena, badi Iya tubuiyaku, novuku ke inaku.”

## 4

*Waifei anatoiyavuyavula anavona matalivulivuna.  
Mad 13:1-9; Luk 8:4-15*

<sup>1</sup> Aku seyana tova kaduwe Yeisu givebutu give-wala Lavu Galili taliyeya. Aku yoo ivagauta ani lakai-moena, e ada waka wagaine giyage giluvealugau aku yoo-dina ani imiya taliyeya.

<sup>2</sup> Ada gaitoma moyaina givewavewaledi vona matalivulivuna wagaidiya, ada yana vewala wagaine givonedi, givonaga,

<sup>3</sup> “Wana nogalina. Kaliva seyana ginau ke yana bakula wagaine witi waifeina gina yavuledi.

<sup>4</sup> Ada waifei giyavuyavuledi aku tufona ibeu wai wagaine aku manuga iela imadukani-yabudi.

<sup>5</sup> Kadu tufona ibeu kakanafaya wagaine, bana wagaine babi keke badobadona, ada madugamowa waifei ikabu, faina babi keke gidaobu lakaina.

<sup>6</sup> Aku kauwana gilaka wagaine, witi kabudi evagudi gikabudi ke imayewadi, faina walamidi keke idaobu velemono.

<sup>7</sup> Kadu tufona ibeu sikakakama wagaine, ada sikakakama gitabo toyogina ke witi gifaimununa, e ada keke gida veguwa.

<sup>8</sup> Aku tufona ibeu babi iwakana wagaine ke itabo iwakana. Ada waifei giveguwa ani tufona guwa inuwagadi teti (30), tufona sikisiti (60), kaduwe tufona analedi (100)."

<sup>9</sup> Ada Yeisu givoned, "Imi gavega wa tagami ani vona taidei wada nogalina."

*Gavana faina Yeisu vona matalivulivuna wagaidiya giifufu?*

*Mad 13:10-17; Luk 8:9-10*

<sup>10</sup> Ada aimo Yeisu anakaike gimiyamiya aku yana yoo tuwelo ke yoo tufona nodi ielai ada yana vona matalivulivuna adialamana faine itolidadanena.

<sup>11</sup> Ada givoned, "Imi wagaimiya ani amiawaega ke Yaubada yana ebaveimeya ananuwanuwa sewasewavuyena wana alamanena. Aku badi gavega keke Yaubada yana yoo wagaidiya ani vona matalivulivuna gaga wagaine ina nogalina

<sup>12</sup> ayo

ina itaita aku keke inaita ke ina alamane,  
ada kadu ina noganogala aku keke nuwadi  
ginamali,  
faina kai wa yadi alamana aga ida nuwawilana  
ke yadi koyona gada venuwaegedi." †

<sup>13</sup> Ada givonediga, "Vona matalivulivuna taidei ani ananuwanuwa maita nuwami

---

† 4:12 Ais 6:9-10

gimalina? Kai keke, aga gavaiyamu-yo wana alamanedi vona matalivulivuna-dina moyaidi aimo gana ifufuyedi?

<sup>14</sup> Waifei anatoiyavuyavula-nai ani Yaubada yana vona giyavuyavulena.

<sup>15</sup> Ada waifei-dina ibeu wai wagaine ananuwanuwa ani vaita badi gavega Yaubada yana vona inogalina anafaiweya. Inogalina e ani Seitani gielai ke vona-nai ibakulina aseasedi wagaidiya ani givaiyavulena.

<sup>16</sup> Aku waifei ibeu kakanafaya wagaine ananuwanuwa ani badi gavega Yaubada yana vona inogalina ada maduga-mowa wa yadi vemwamwala ivetumaganena.

<sup>17</sup> Aku vona-nai ani keke idavai ada ida-sei aseasediya ida miyami, vaita walamidi keke idasei,<sup>†</sup> e ada tova maufo-moena iatuvefaila. Badi Yaubada yana vona ivetumaganena, aku kai tova vitana gina yegemona wagaidiya o kai kaliva ina kiveuloulolonidi aga maduga-mowa yadi vetumagana-nai ina segena.

<sup>18</sup> Aku waifei giyavuyavulena sikakakama wagaine ananuwanuwa ani taidei anafaiweya. Badi gavega Yaubada yana vona inogalina

<sup>19</sup> aku babi anagaitoma moyaina ananuwanuwa ke kaikaiwabu ananuwakabubu lakaina aseasedi wagaidiya, ani ifwayafwayadi e ada keke ida veveguwa. Kaduwe badi gaitoma moyaidi tulina tulina iitaitaluvadigedi, ada taidei wagaine Yaubada yana vona-nai inogalina ani gifaifaimununa e ada keke ida guwaguwa.<sup>†</sup>

---

<sup>†</sup> 4:17 Kol 2:7    <sup>†</sup> 4:19 Mak 10:21-22, 1Tim 6:9-10

<sup>20</sup> Aku waifei-dina ibeu babi iwakana wagaine ananuwanuwa ani badi gavega Yaubada yana vona inogalina ada ivetumaganena, e ada yadi dewa wagaidiya guwa iwakana iseseyegemonena. Tufona teti (30), tufona sikisiti (60), ke tufona analedi (100)."

*Mayale anaebaibo wagaine kanasena.*

*Luk 8:16-18*

<sup>21</sup> Kaduwe givonediga, "Gavaiyamu, mayale kana kabuna ada ivi dibune kanasena? O kai wela wagaine kana lukabubuna? Keke. Au mayale anaebaibo wagaine kanasena.†

<sup>22</sup> Faina gaitoma-dina tova malinai sewasewavuyedi ani aimo ina ivemogatalidi, kaduwe gaitoma-dina lulukabubudi ani aimo ina seyegemonedi malina wagaine.†

<sup>23</sup> Imi gavega wa tagami ani vona taidei wada nogalina."

<sup>24</sup> Kaduwe givona, "Yaubada yana nuwanuwa wana nogalina. Wana nogali-dewedewena. Kai Yaubada bonana ananogala wagaine wana idibumwaiga, aga alamana wana vaina ada kaduwe Yaubada yami alamana gina kiveinalina.

<sup>25</sup> Faina badi gavega Yaubada yana vona inogalina ke ivevefaisewana ani badi kaduwe alamana gina veledi, e ada Yaubada anaalamana badi wagaidiya gina tubuga-mowa. Aku gavega Yaubada yana vona keke ida vevefaisewa, badi yadi alamana kabisona ani Yaubada gina vaiyegenana wagaidiya."

*Waifei yana tabo anavona matalivulivuna.*

---

† 4:21 Mad 5:15, Luk 11:33    † 4:22 Mad 10:26, Luk 12:2, 8:17

<sup>26</sup> Ada kaduwe Yeisu givona, “Yaubada yana ebaveimeya ani anafaiweya kaliva waifei giyavulena yana bakuleya.

<sup>27</sup> Ada bogi wagaine ginadau ada malabutuya gina mididi aku waifei itabotabo, aku keke gida alamane gavaiyamu waifei-dina itabotabo.

<sup>28</sup> Faina babi giveiveimeya waifei yadi kabu ada yadi taula ke yadi veguwa.

<sup>29</sup> Ada kai lukuna gina tafana aga bademowa gikumagina ada kwasikwasi wagaine ina dabana, faina iyala yana tova.”†

*Musita waifeina anavona matalivulivuna.*

*Mad 13:31-32; Luk 13:18-19*

<sup>30</sup> Ada kaduwe Yeisu givonediga, “Yaubada yana ebaveimeya ani gavana wagaine kada vonaveluveye? O kai gava vona matalivulivuna kada awaluveluve anakivemala faine?

<sup>31</sup> Yana ebaveimeya ani vaita musita waifeina seyana anafaiweya. Waifei matatabuna imiyamiya babi ya ani wagaidiya musita waifeina ani kabiso-moena.

<sup>32</sup> E aku ina bakulina wagaine, au ginatabo lakaina, ada gavana gitabotabo bakula wagaine ani matatabuna gina tabosegedi. Kaduwe lagana ginasedi ke aiwaudiya manuga adiuba ina bubudi.”

<sup>33</sup> Ada vona matalivulivuna moyaidi anafaiweya wagaidiya Yeisu giifufuyedi, anafaiweya adifata ina alamanedi.

<sup>34</sup> Keke gida ifufu-mowa kaliva wagaidiya aku vona matalivulivuna gaga wagaidiya, aku tova-nai

---

† 4:29 Ive 14:15

adiloi gaga Yeisu ke yana tonogalayavo nodi, aga gaitoma moyaina faina gikikivemalina wagaidiya.

*Yeisu mala lakaina giawatana ke giniwalova.  
Mad 8:23-27; Luk 8:22-25*

<sup>35</sup> Ada yadayada-nai analavilavi wagaine, Yeisu yana tonogalayavo givonedi, “Kana damana lavu fafaline.”

<sup>36</sup> Ada yoo lakaina imadu yabuyabudi aku waka-nai wagaine Yeisu gimiyamiya ani yana tonogalayavo iyage ada nodi itauya. Kadu waka tufodi nodi inau.

<sup>37</sup> Aku yadi damana-nai wagaine mala lakaina inuwagana, ada buli lakaidi waka iiwatavutavuna.

<sup>38</sup> Aku Yeisu ani waka muline giveunugana ada gienowavulu. E ada yana tonogalayavo ina ilivaguna, ivonena, “Tovewala, kai keke uda nuwanuwa kana yababa faina?”

<sup>39</sup> Ada Yeisu gimididi ke mala giawatana, ada givona buli wagaidiya, “Auwe! Gina kuluni!” Ada maduga-mowa mala giavaina ke giniwalova.<sup>†</sup>

<sup>40</sup> Ada Yeisu yana tonogalayavo givonedi, “Gavana faina wamatauta? Gavaiyamu, aimoina keke wa yami vetumagana?”

<sup>41</sup> Aku tonogalayavo imatauta lakaina ke taudiyavo ivetolitoli, ivonaga, “Ida gavakaliva ayo mala ke buli bonana imatawalewaleye!”

---

<sup>†</sup> 4:39 Mad 8:26, Luk 8:24

## 5

*Kaliva aluwaluwa bwanebwanenedi nafone imiyamiya ani Yeisu gikiveiwakanena.*

*Mad 8:28-34; Luk 8:26-39*

<sup>1</sup> Aku Yeisu yana tonogalayavo nodi idamana ke iyalili lavu fafaline, tayuwe meGelasa yadi fafali wagaine.

<sup>2</sup> Ada waka wagaine Yeisu giobu ani kaliva seyana giyegemona didikula\*\* adifafaliya ke gielai Bana wagaine. Kaliva-nai ani aluwaluwa bwanebwanenena nafone gimiyamiya,

<sup>3</sup> ada yana ebamiya ani didikula-dina wagaidiya. Ada keke tamo gaito anafata ginayogo seini wagaine,

<sup>4</sup> faina tova ke tova nimana ke agena iyo-goyogodi aku seini gigologoloidi, kaduwe agena analokafu gidobodobodi, e ada keke tamo gaito anafata gina kiveyabi.

<sup>5</sup> Ada kaduwe yadayada ke bogi wagaidiya ani didikula ke oya wagaidiya givekovakova aku tauna kabala wagaidiya gitalatalana.

<sup>6</sup> Aku tova-nai atuwadeya giitana Yeisu ada gimadu ginau ke tugana givetodonena Yeisu debaine.

<sup>7-8</sup> Aku Yeisu aluwaluwa bwanenena givonena, givonaga, “O aluwaluwa bwanebwanenena, una yegemona kaliva taidei wagaine!”

E aku banae givedou moiyalina, givona, “Yeisu, O Yaubada Togetanemwane Natuna! Gavana

---

\*\* 5:2 MeIsileli ani yadi didikula ina yaladi kabala-mowa oya wagaidiya, anafaiweya luwa, ada anawana ina sebodana kabala lakaina wagaine. Gabu seyana yadi toalika inasedi didikula seyana negenine.

unagai wagaikuya? Yaubada anayeganeya gave-oleni, keke una kiveulouloniku!"

<sup>9</sup> Ada Yeisu gitolidadanena, "Gavaiyamu ayegana?"

Bana gilufata, "Iya akuyegana Manuwafo, faina imeyavo ani moyai-moema."

<sup>10</sup> Aku giveoveola toyogina Yeisu wagaine vaita keke aluwaluwa bwanebwanenedi gina imilidi fafali-nai wagaine ina yegemona.

<sup>11</sup> E aku lilivadiya oya afaine ani bawe moyaidi iduwaduwala,

<sup>12</sup> ada aluwaluwa bwanebwanenedi Yeisu iala-mamaiyena, ivonaga, "Uda imilima adana tayuwe bawe-dina wagaidiya adaluku!"

<sup>13</sup> Au giawaegedi. E ada aluwaluwa bwanebwanenedi\*\* iyegemona kaliva-nai wagaine aku inau bawe wagaidiya iluku, ada au bawemoedi matatabudi iluyabayabanunuga oya wagaine iobu ke ikamomola lavu wagaine. Bawedina adiyoo anafaiweya tu tausani (2,000).

<sup>14</sup> Aku kaliva bawe iitaitaveyabidi ani iveotaota imadu inau, ada gaitoma-nai iitana ani iawamogatalena melala lakaina ke melala kabisodi matatabuna wagaidiya. Ada kaliva itauya ke ina itana gavana giyegemona.

<sup>15</sup> Ada ielai Yeisu wagaine ani iitana kaliva-nai aluwaluwa bwanebwanenedi iyegemona wagaine ani givetovetoga, aku bademowa yana nuwanuwa giveiwaka ke wa ananuya

---

\*\* **5:13** Vewaga-dina 'aluwaluwa bwanebwanenena' ada 'aluwaluwa koyona' ani aluwaluwa seyana. Iluwei ani aluwaluwa koyona. Vewaga-nai 'aluwaluwa bwanebwanenena' ivegugaiyena faina Yaubada matane taidei bwanebwanenena.

gimiyamiya. Ada yoo-dina iitana ani imatauta lakaina.

<sup>16</sup> Ada badiyavo toitavedama ani iawamogatala kaliva wagaidiya gavana giyegemona kaliva-nai wagaine ke kaduwe gavaiyamu bawe iga faina.

<sup>17</sup> Ada au yoo-dina Yeisu iveoveolena toyogina ke yadi fafali gina segena.

<sup>18</sup> Ada Yeisu gina waka wagaine giyageyage aku kaliva-nai aluwaluwa bwanebwanenedi iyege-mona wagaine ani gialamamaiyena, givonaga, “Iya nodi kadanau!”

<sup>19</sup> Aku Yeisu giawatana ke givonenaga, “Unanau ya manuweya ada ya gabuyavo ina itani, aku tauni una awamogataleni Yaubada yana leme ke yana nuwakalikali wagainiya faina.”

<sup>20</sup> Ada au, bana kaliva-nai giyewa ginau ke tauna giawamogatalena meDekafolisi\*\* wagaidiya Yeisu yana leme wagaine faina. Ada kaliva moyaidi meyadi gisidobodobona.

*Yeisu kwamana alialikana ada vavine veoveogina gikiveiwakanedi.*

*Mad 9:18-26; Luk 8:40-56*

<sup>21</sup> Ada kaduwe Yeisu giyewa-vagilena lavu fafali waka wagaine, aku yoo lakaina ivagauta taliya-nai wagaine imidififina.

<sup>22</sup> Aku kaliva seyana gielai anayegana Yailo, banae manuwa ebavewala anatonagona seyana. Ada tonagona-nai Yeisu giitana ke agene tugana givetodonena

---

\*\* **5:20** Fafali-nai anayegana ‘Dekafolisi’ ani anakivila ‘melala lakaidi aditeni’. E ada fafali-nai wagaine kaliva-nai ginau ani lakai-moena, ada kaliva moyai-moedi wagaidiya tauna giawamogatalena.

<sup>23</sup> aku giveola toyogina Bana wagaine, givon-aga, “Natuku vavine kabisona ani giveoga, ada tova kabisona gina alika. Udaela nima udasena bana wagaine e ada gida veiwaka ke gidamiya.”

<sup>24</sup> Au Yeisu kaliva-nai nodi inau.

Ada yoo lakaina imuliyena aku Yeisu iffina ada ivetutuwaiwainau.

<sup>25</sup> Aku yoo-dina wagaidiya vavine seyana banae anaveoga ani malamala tuwelo dayagina gimadumadu.

<sup>26</sup> Bade ginaunau doketa moyaidi wagaidiya yadi leme faine, e aku au nimadiya uloulolo lakaina ginuwagana. Yana mani matatabuna bade givele-yabudi fatadi faina, aku doketa yadi galuvaluwa wagaine ani keke gida bwaibwaina aku anaveoga gitubutubuga-mowa.

<sup>27</sup> Aku vavine-nai Yeisu valeyana bademowa ginogalina faina, yoo negenidiya Yeisu wamuline gielai ada nimadidina gisedi ananuya wagaine.

<sup>28</sup> Faina nuwainagene-deya givona, “Kai ananuya gagana wagaine nimadidiku ganasedi, aga gana veiwaka.” †

<sup>29</sup> Ada nimadidina gisedi ananuya wagaine, ke maduga-mowa dayagina gimadumadu ani giilovau. Ada tauna vovona nafone-deya gilutovonina vaita bademowa giveiwaka.

<sup>30</sup> Ada Yeisu gilutovonina vaita toyogina Tauna wagaine giyegemona, e ada maduga-mowa gimiyavilana yoo nefanidiya aku gitolidadana, givona, “Gaito nimadidina gisedi akunuya wagaine?” †

---

† 5:28 Mak 6:56    † 5:30 Luk 6:19

<sup>31</sup> Ada yana tonogalayavo ivonenaga, “Bademowa uitana kaliva iyoofifini ada ivetuvetutuni, aku utolidadana ‘Gaito nimadidina gisedi wa-gaikuya?’ ”

<sup>32</sup> Aku Yeisu aimo giitadadana yoo wagaidiya ke gina itana gaito nimadidina gisedi bana wa-gaine.

<sup>33</sup> Au vavine-nai bademowa gialamanena gavana giyegemona bana wagaine faina, ada wa yana matauta ke wa yana vetatava aku gielai tugana givetodonena Yeisu agene, ada giawamogatala gavana matatabuna giyegemona wagaine.

<sup>34</sup> Ada Yeisu givonena, “Natuku, ya vetumagana gikivebwainini.<sup>†</sup> Una mididi ke wa ya nuwanivalova unanau, faina bademowa uveiwaka.”

<sup>35</sup> Ada aimo giifuifufu aku kaliva tufodi Yailo yana manuweya-deya ielai ada ivonaga, “Natu bademowa yawaina giavaina. Keke aimo Kauveya una luluveyavale e ada yana tova una venuwaegege.”

<sup>36</sup> Aku Yeisu vona taidei ginogalina ada givona Yailo wagaine, givona, “Keke una matauta, au una vetumagana.”

<sup>37</sup> Ada keke seyana gaito gida awaege gina muliye, tainei-mowa Pita ada Iyemesa ke anatubuluga Iyoni.

<sup>38</sup> Ada iyegemona Yailo yana manuweya ada Yeisu giitadi totagiya itagilukuikui ke ivevetalageyo.

<sup>39</sup> Giluku ke givona wagaidiya, givona, “Gavaiyamu-yo waaseuloulolo ke watagitagiya? Kwamana keke gida alika aku gidaudau.”

---

<sup>†</sup> 5:34 Mak 10:52, Luk 7:50, 17:19

<sup>40</sup> Aku badi iveleigena. E au Yeisu moy-aidi giveyegemonidi melaleya, aku kwamana-nai inana ke tamana ada anatomuliya aditoto nodi iluku tutulagolota-nai wagaine kwamana ivenobalina.

<sup>41</sup> Ada nimana gikiveyabina aku Tauna meyana wagaine givonenaga, “Talita kumi!” Anakivila ani “Natuku vavine kabiso, gavoneni, una mididi!”†

<sup>42</sup> Ada maduga-mowa kwamana gimididi ke ginudadana. Kwamana-nai anamalamala tuwelo. Ada inana ke tamana meyadi gisidobona.

<sup>43</sup> Aku Yeisu veimeya toyogina giveledi, keke ina awamogatale yana gugai faina. Ada kaduwe givonedi vaita aa tamo inavele kwamana gina kanina.

## 6

*MeNasaledi Yeisu keke ida vemoimoina.*

*Mad 13:53-58; Luk 4:16-30*

<sup>1</sup> Ada Yeisu Yailo yana fafali gisegena aku giyewa Tauna yana melala Nasaledi wagaine, ada yana tonogalayavo imuliye nodi inau.

<sup>2</sup> Ada Sabate wagaine gina giluku manuwa ebavewala wagaine ada givebutu givewala. Ada givewavewala aku badi ivanewanenegenani meyadi gisidobodobona ke ivonaga, “Kaliva taidei ani gadedeku gaitoma taidei givaidi? Ida nuwauya givaina ani gavana vuvuna? Gavaiyamu e ayo gugai ebameyasidobodobo toyogi-vagaidi gigugaiyedi?”†

---

† 5:41 Luk 7:14    † 6:2 Iyo 7:15

<sup>3</sup> Aku banae ani au manuwa anatoyogona, kaduwe Meli natu-moedi. Tainavo ani Iyemesa ke Iyosefa, ada Yudasa ke Saimoni. Kaduwe novunavo nodi kamiyamiya.” Ada idibusoyogena.<sup>†</sup>

<sup>4</sup> Ada Yeisu givona wagaidiya, givona, “Falofita ani fafali moyaina wagaidiya kaliva ivemoimoinena, aku tauna yana yoo yana fafali wagaine keke ida vemoimoina.”<sup>†</sup>

<sup>5</sup> E ada wadedeku keke anafata gugai ebameyasidobodobo gina gugaiyedi, aku inogame-nai toveoga adigavaiyei gaga wagaidiya nimana gisena ke gikiveiwakanedi.

<sup>6</sup> Aku meyana gisidobodobona, faina kaliva keke ida vetumagane. Ada wadedeku Yeisu gisegena aku gibalawalilivuga melala seyana seyana wagaidiya givevewala.

*Yeisu afositolo adituwelo giimilidi ina faisewa.  
Mad 10:5-15; Luk 9:1-9*

<sup>7</sup> Ada tonogalayavo adituwelo gidouweva-gauwidi ke givebutu giimilidi adiselu adiselu. Ada veimeya giveledi e ada wa yadi veimeya aluwaluwa bwanebwanenedi ina veyegemonidi kaliva wagaidiya.

<sup>8</sup> Ada kaduwe giveimeyedi, givonaga, “Keke tamo gavana wanavai yami nau-nai faina, taineimowa aiwala gaga. Keke aa, keke fose, kaduwe keke mani.<sup>†</sup>

<sup>9</sup> Ageyafayafa wana osedi, aku keke seti anavelu wanaose.

---

<sup>†</sup> 6:3 Iyo 6:42    <sup>†</sup> 6:4 Iyo 4:44    <sup>†</sup> 6:8 Luk 10:1-9

10 Gavatoveya toni manuwa yana manuweya gina lukuwemi, manuwa-nai wagaine wana miyamiya analaba melala-nai wana miyasegena.

11 Kai melala seyana wagaine wanaluku aku anakaliva keke ina vagaulemi ada yami laumamala keke ina nogali, aga melala-nai wana segena wagaine, anasivu agemiya wana vatuegegena. Wada iyaiyaya seyana aimo Yaubada yana matavuloga wagaidiya faina.” † Taidei anafaiweya Yeisu afositolo adituwelo givona wagaidiya.

12 E ada badi itauya inau kaliva adiyoo tulina tulina moyaidi wagaidiya, ke ilulumamala vaita yadi dewa koyona wagaidiya ina nuwawilana aku ina awaegedi Yaubada wagaine.

13 Ada kaduwe aluwaluwa bwanebwane nedi moyaina iveveyegemonidi kaliva wagaidiya, ada toveoga moyaidi bunama kuluwadiya iiwai-wavekelolodi ke ikikiveiwakanedi.†

*Iyoni Tobabitaiso odona ilugoloina.*

*Mad 14:1-12; Luk 9:7-9*

14 Ada bademowa Yeisu valeyana gimutula fafali moyaina wagaidiya, e ada Kini Elodi ginogalina. Kaliva tufodi ivona, “Yaubada Iyoni Tobabitaiso alikeya gisiveyawa-vagilena. Tainei faina wa yana toyogina ke gugai ebameyasidobodobo gifaifaisewadi.” †

15 Ada tufodi ivona, “Banae Ilaitiya.” Kaduwe tufodi ivona, “Banae falofita, tova tuwaina anafalofita seyana anafaiweya.”

---

† 6:11 Gug 13:51, 18:6, Luk 4:10-12 † 6:13 Iyem 5:14 † 6:14 Mad 16:14, Mak 8:28, Luk 9:19

16 Aku Elodi ginogalina wagaine, givonaga, “Wada Iyoni Tobabitaio odona galugoloina ani giyawa-vagila!”

17-18 Elodi givona anafaiweya faina tuwaina anatubuluga Filipi vavinena adiyegana Elodiyasi ani Elodi tauna giluobuyedi. Ada taidei faina bana Iyoni gielaelai ada givona-vavagilena Elodi, givonenaga, “Taidei ya dewa-nai udewayena tawaga Filipi vavinena uluobuyedi, ani ina veimeya uyawelina.” Ada Elodi keke gida vemwamwala Iyoni yana vona-dina wagaidiya e ada yana togugaiyavo giveimeyedi ke Iyoni ikiveyabi iyogona ada deli wagaine isena.<sup>†</sup>

19 Ada tayuwe wagaine Elodiyasi nuwadi gikoyo lakaina Iyoni wagaine, ke yadi nuwakoyo ikitaitaina e ada nuwanuwadi Iyoni ina luvealikana. Aku keke adifata,

20 faina Elodi gialamanena Iyoni banae to-tunutunugina ada kaduwe tabutabuna, e ada gimatausena. Taidei faina Elodi Iyoni giyavana ke gikibababalena. Banae keke wa yana vemwamwala Iyoni yana ifufu wagaine aku auwe nuwanuwana gina noganogala.

21 Aku Elodiyasi wai ilelele vaita Iyoni ina luvealikana, ani yadi tova iwakana inuwagana tova-nai Elodi yana tubuga anayadayada anatova wagaine. Elodi tauna yana ebanuwaududu anakanibutu lakaina gifaisewana kaliva lakaidiyavo moyaidi faidiya, badi yana kabemali aditoveimeya lakaidiyavo ada tolugaviya

---

<sup>†</sup> 6:17-18 Luk 3:19-20

aditonagonayavo ke kaduwe kaliva lakaidiyavo Galili wagaine.

<sup>22</sup> Ada nodi ikanikani aku Elodiyasi natudi vavine kabisona ani gielai gitavotavola yoo matadiya, ada Elodi ke anawakawakayavo gikivemwamwalidi. E ada kini givonadabadaba toyogina kwamana-nai wagaine, givonaga, “Gavana una veola wagaikuya, gana veleni.

<sup>23</sup> Gavoneni velemono, kai una veoleku tu-fona yaku ehaveimeya faina, aga gana ludaka gana veleni.”

<sup>24</sup> Ada kwamana giyegemona ke inana givonedi, “Gavana gada veola?”

Ada inana ivonena, “Kini una vonena, ‘Iyoni Tobabitaizo kuluwana.’ ”

<sup>25</sup> Ada maduga-mowa natudi giyewana kini wagaine ada giveolena, givonaga, “Nuwanuwaku tova malinai-mowa Iyoni Tobabitaizo kuluwana nauwa wagaine uda veleku.”

<sup>26</sup> Tayuwe wagaine Kini Elodi nuwana givita lakaina, aku anawakawakayavo matadiya givonadabadaba toyogina faina, auwe keke anafaiweya kwamana-nai yana nuwanuwa gina dibusoyoge.

<sup>27</sup> E ada maduga-mowa Kini giveimeya ada tolugaviya seyana ginau ke deli wagaine Iyoni odona gilugoloina,

<sup>28</sup> ada kuluwana nauwa wagaine gidodona ada gialiyе kwamana givelena. Ada banae ginauwe inana giveledi.

<sup>29</sup> Ada tova-nai Iyoni yana tonogalayavo valeyana inogalina, iela vovona ivaina ada didikula luwa yaiyaina wagaine isena.

*Yeisu kaliva faifi tausani (5,000) givekanidi.*

*Mad 14:13-21; Luk 9:10-17; Iyo 6:1-15*

<sup>30</sup> Aku afositoloyavo Yeisu wagaine iyewadi, ada gavana anafaiweya igugaiyena ke ivewalanau ani iawatalatalainena.<sup>†</sup>

<sup>31</sup> Aku kaliva moyaidi ielaelai ada inaunau e ada keke tamo mwatugu ke Yeisu yana afositoloyavo nodi ina veyawai-yo inakani. Taidei faina Yeisu givonedi, “Kananau makakaudaga wagaine ada maita kana veyawai.”

<sup>32</sup> Ada adiloï gaga waka iyagena ke inau seyana fafali kavovona wagaine.

<sup>33</sup> Aku badi inaunau ani kaliva moyaidi iitadi ke iinanadi. Ada ialamanena gavafafali wagaine inaunau, e ada yadi melala seyana seyana isegedi aku agediya wai inago imadu inau fafali-nai wagaine.

<sup>34</sup> Ada Yeisu waka wagaine giyalili ani yoo lakaina giitadi wagaine ginuwakalikaliyedi, faina badiyavo vaita sifi keke wa aditoitaveyabina anafaiweya.<sup>†</sup> E ada givebutu gaitoma moyaina givewavewaledi.

<sup>35</sup> Mala givelavilavi aku yana tonogalayavo ielai Yeisu wagaine ivona, “Ida mwatugu kavovona wagaine kamiyamiya ada mala gibogibogi.

<sup>36</sup> Kaliva uda imilidi idanau melala wagaidiya adiga ida kimone.”

<sup>37</sup> Aku Bana gilufata wagaidiya, givonaga, “Imi taumiyavo aa wana veledi inakani.”

---

<sup>†</sup> 6:30 Luk 10:17    <sup>†</sup> 6:34 Mad 9:36

Badi ivona, “Gavaiyamu, nuwanuwa ananau ada mani lakaina ana segena aa wagaine, ada ana veledi inakani?”

<sup>38</sup> Ada Yeisu givonedi, “Gavaiyei beledi wagaimiya? Wanana wanalele.”

Ada inau ke beledi ilelena ada inuwagadi, ada iyewadi Yeisu wagaine imatawena, ivona, “Beledi faifi ada igana iluwei.”

<sup>39</sup> Ada Yeisu yana tonogalayavo givonedi, “Kaliva wana vutugedi yoo yoo wagaidiya ada ina vetoga talaguwaleya.”

<sup>40</sup> Ada yoo ivutugedi ivetoga tufodi analedi (100), tufodi fifiti (50).

<sup>41</sup> Ada Yeisu beledi faifi ke igana iluwei givaidi ada giitalaka gabama wagaine aku givona vesiule Yaubada wagaine, ada beledi gikiineinedi ke givedi tonogalayavo ke badi ivutugena kaliva wagaidiya. Kadu igana anafaiweya, gikiineinena ke givutuga moyaidi wagaidiya.

<sup>42</sup> Ada moyaidi ikani ke kamodi ifata.

<sup>43</sup> Ada tonogalayavo inau beledi ke igana aditufu ikwakwana ani fuwama tuwelo ivemagadi.<sup>†</sup>

<sup>44</sup> Badi kaliva gaga beledi ikanina ani adiyoo faifi tausani (5,000).<sup>\*\*</sup>

*Yeisu lavu tabone ginunudadana.*

*Mad 14:22-33; Iyo 6:16-21*

<sup>45</sup> Ada kani muline, maduga-mowa Yeisu yana tonogalayavo waka wagaine giveyagedi ke wai inanago ina damana lavu fafaline melala

<sup>†</sup> 6:43 Mak 8:1-9

<sup>\*\*</sup>

6:44 Keke vevine ke biyabiyama ida veyawadi. Imiya, aku kaliva gaga iveyawadi.

anayegana Bedesaida wagaine, aku Banae ginamiya ke yoo gina imilidi ina vebiawaawala.

<sup>46</sup> Ada kaliva givetalakafoiyedi, aku anakaibe gilaka oya wagaine ke gina veoveola Tamana wagaine.<sup>†</sup>

<sup>47</sup> Ada bademowa mala gibogi aku tonogalayavo lavu nefanine waka wagaine, aku Yeisu anakaibe-mowa avaleya.

<sup>48</sup> Aku giitadi yana tonogalayavo voi wagaine ivenuwakalikali velemonoena, faina mala gilubibibi wadebaidiya-deya ke giluveyeveyewadi. Ada malalavuga anafafali wagaine Banae ani lavu getane givaga-mowa ada ginaunau wagaidiya. Ada evona vaita gida nugulidi

<sup>49</sup> aku tonogalayavo iitana lavu getane ginunudadana, ada yadi nuwanuwa vaita balauma. E ada ikwekwela,

<sup>50</sup> faina matatabudi iitana ada imatauta lakaina. Aku maduga-mowa givona wagaidiya, givona, “Wana asevatu, ida Iya Tauku. Keke wana matauta.”

<sup>51</sup> Ada ginau wagaidiya ke waka wagaine giyage ani au mala giatagona. Ada meyadi gisidobodobona,

<sup>52</sup> faina keke nuwadi gidamali tova-nai beledi gikiinena wagaine. Au aseasedi ikuga.

*Yeisu toveoga gikiveiwakanedi Genesaleti wagaine.*

*Mad 14:34-36*

<sup>53</sup> Ada lavu italadamanina ke inau fafaline Genesaleti taliyeya ada waka ilomuna.

---

<sup>†</sup> 6:46 Mak 1:35, Luk 5:16, 6:12

<sup>54</sup> Aku waka wagaine idaobu ani madugamowa kaliva Yeisu iitainanana,

<sup>55</sup> ada imadu inau yadi fafali moyaina wagaidiya yadi toveogayavo adiivi wagaidiya iwaidi ialiyedi gadedeku inogalina Yeisu gimiyamiya wagaine.

<sup>56</sup> Ada gadamamauwe Yeisu ginaunau, kai melala kabisodi o lakaidi o kai awaawana wagaidiya, ani toveoga ialialiyedi ke melala nefanine isesedi. Ada iveoveolena toyogina vaita toveoga gina awaegedi ke ananuya bwatana-ga nimadididi inasena wagaine. Ada badi gavega nimadididi isena ani matatabuna iveiwaka.

## 7

*Yeisu giifufu yegayegana ada bwanebwanenena faidiya.*

*Mad 15:1-9*

<sup>1</sup> Tova seyana Falisiyavo ke veimeya anatove-walayavo tufodi ielai Yelusalema-deya ada ivagauta Yeisu wagaine.

<sup>2</sup> E aku iitana yana tonogalayavo tufodi ani nima anaikola anaveimeya keke ida muliye aku au ikanikani. E ada badi yadi nuwenuweya vaita tonogala-dina Yaubada matane wa nima bwanenedi ikanikani.

<sup>3</sup> Faina Falisiyavo ke meIsileli matatabudi adigiduwa tuwaina-deya yadi kaliva lakaidiyavo wagaidiya anafaiweya, nagona nimadi inakoladewedewedi, muliya inakani.

<sup>4</sup> Kai inayewa maketi anafafali wagaine, aga keke ina madukani aku nagona taudiyavo inakoladewedewedi. Ada kaduwe yadi veimeya

moyaina iitaitaveyabidi, anafaiweya vei, tuwava, nauwa, ke ivi ikolakoladi yadi tafalolo anaveimeya anafaiweya.

<sup>5</sup> Taidei faina Falisiyavo ke veimeya anatove-walayavo itolidadanena Yeisu, ivona, “Gavana faina ya tonogalayavo keke ida muliye yada kaliva lakaidiyavo adigiduwa anaveimeya? Faina wa nima bwanenedi ikanikani.”

<sup>6</sup> Yeisu givonediga, “Aiseya gifalofisai ke give-tokilumina vona velemono imi meyalugaluga faimiya. Falofisai-nai wagaine Yaubada givona,

‘Ida yoo-nai ani awakebuladiya ivemoimoineku, aku aseasedi ani imiya atuwada Iya wagaikuya.

<sup>7</sup> Yadi vewala ani keke Iya Yaubada yaku nuwanuwa wagaine aku au kaliva-mowa yadi nuwenuweya.

E ada Iya wagaikuya ioduodu-wayoga.’ †

<sup>8</sup> Ada Yaubada yana veimeya tabu wasemuliyena, aku kaliva-mowa adigiduwa tuwaina wakiveyabina toyogina.”

<sup>9</sup> Ada Yeisu givonedi, givonaga, “Imiyavo Yaubada yana veimeya waseseliyena e ada tau-miyavo amigiduwa tuwaina wana itaitaveyabina. E aku gavaiyamu, wanuwanuwa vaita taide wainai ani iwakana faimiya? Keke.

<sup>10</sup> Faina tuwaina Yaubada yana veimeya Mosese giawamogatalena, givona, ‘Ina ke tama

---

† 7:7 Ais 29:13

una vemoimoinedi.<sup>†</sup> Kaduwe veimeya seyana ani, 'Kai gaito inana o tamana wagaidiya ginavona awadamana, aga banae gilubodana gina alika.'<sup>†</sup>

<sup>11</sup> Aku imiyavo ani wavona vaita kai kaliva inana o tamana gina vonedi ginavona, 'Gava yaku giba wagaine vaita gada lememi, taine yaku nuwakabubu-nai bade gaawaegena Yaubada wagaine. Taide faina keke akufaiweya gana lememi.'

<sup>12</sup> Ada tayuwe wagaine Yaubada anayeganeya seba wasesena, e ada kaliva inana ke tamana keke gida vemoimoinedi ke yana leme gida veleveledi.

<sup>13</sup> Ada taidei amigiduwa-nai tamamiyavo nagona wagaidiya wavesesedamani waaliyena, aku Yaubada yana vona ani anaveimeya wavegaitoma-kavokavovoyena. Kaduwe gaitoma moyaidi anafaiweya wagugaiyedi."

<sup>14</sup> Ada kaduwe Yeisu yoo gidouwedi ke ivagauta wagaine ada givonedi, "Moyaimi, yaku vona wana nogalina ada nuwami gina malina.

<sup>15-16</sup> Keke tamo gava aa kaliva ina kanina e ani Yaubada matane gina kivebwanenedi. Aku gavana kaliva aseasedi negenidiya imiyamiya e aku inayegemona, taine Yaubada matane gina kivebwanenedi."

<sup>17</sup> Taidei anafaiweya Yeisu givona aku yoo gisegedi ke giluku manuwa wagaine, ada yana tonogalayavo itolidadanena yana vona matalivulivuna-nai faina.

<sup>18</sup> Ada Yeisu givonedi, givona, "Taumada, imi kaduwe nodi keke nuwami gidamali.

---

<sup>†</sup> 7:10 Iyeg 20:12    <sup>†</sup> 7:10 Iyeg 21:17

Gavaiyamu, keke wada alamane vaita gavana kai ginaluku kaliva awadiya ani keke gina kivebwanene Yaubada matane?

<sup>19</sup> Faina tova-nai ginaluku, keke aseasedi wagaidiya ginana aku ginanau kamodi wagaidiya ada gina yegemona.” Ee, yana vona taidei wagaine Yeisu giawamogatala vaita keke tamo aa awaawatana, aku aa matatabuna ani yegayegadi Yaubada matane kani faina.

<sup>20</sup> Ada kaduwe givona, “Aku gavadi ina yegemona kaliva nuwainagediya ani gaitomadina kaliva ikikivebwanenena.

<sup>21</sup> Faina kaliva nuwainagediya-deya ani nuwanuwa koyodi iyegeyegemona, anafaiweya vovo anaawaenge-kavokavovo, baninivula, kiyafu, luvealika, udo,

<sup>22</sup> italuvadiga, dewa koyona, fwaya, gadawedawelo, nuwalaka, dewa kavokavovo, kaliva anaveloi ani anayegana anakivekoyo faina. Ada kaduwe, kaliva yadi giba o kai adiivi iitaitaluvadigedi e ada iagouga faidiya.

<sup>23</sup> Taidei gaitomadina koyodi moyaidi iyegeyegemona kaliva nuwainagediya, ada ikikivebwanenena Yaubada matane.”†

*Vine Fonisiya Yeisu ivetumaganena-yo natudi giveiwaka.*

*Mad 15:21-28*

<sup>24</sup> Ada Yeisu fafali-nai gisegena aku ginau melala Taiya anafafali wagaine.\*\* Ada ginau manuwa seyana wagaine giluku, ada keke

---

† 7:23 Lom 1:29-31, Gal 5:19-21  
wagaine ani badi keke meIsileli.

\*\* 7:24 Kaliva Taiya anafafali

nuwanuwana tamo gaito gina alamane vaita Banae wadedeku-deya gimiyamiya, aku keke anafaiweya sewasewavuyena gina miyami.

<sup>25</sup> Aku vavine seyadi, badi natudi vavine kabisona ani aluwaluwa bwanebwanebwanenena nafone gimiyamiya. Badi inogalina Yeisu valeyana, ada maduga-mowa ielai wagaine ke agena wagaine iiboula-mowa.

<sup>26</sup> Vavine-dina badi vine Gilisi, aku Fonisiya itubuga, Siliya anafafali wagaine. Ada Yeisu ialamamaiyena vaita natudi wagaine aluwaluwa koyona gida veyegemonina.

<sup>27</sup> Bana givonedi, givona, “Gilubodana nagona biyabiyama adiga inakani. Keke gida luboda biyabiyama adiga kanavai kana batuge galuweta wagaidiya.”

<sup>28</sup> Badi ivona, “Ika, Kauveya. Aku galuweta teibeli dibune ani biyabiyama adimukumuku ikwakwakwa.”

<sup>29</sup> Ada Yeisu givonedi, “Yami vona taidei faina ada wananau yami manuweya. Aluwaluwa koyona bademowa giyegemona natumi wagaine.”

<sup>30</sup> Ada vavine iyewadi yadi manuweya ada inuwagana natudi gidaudau ivi wagaine, aku bademowa aluwaluwa koyona kwamana wagaine giyegemona ke ginau.<sup>†</sup>

*Kaliva tagana kuluna ada keke anafaiweya gina ifufu-dewadewa ani Yeisu gikiveiwakanena.*

<sup>31</sup> Ada Yeisu Taiya anafafali gisegena aku gigolota Saidoni ada ginau Lavu Galili wagaine, tayuwe Dekafolisi anafafali wagaine.

---

<sup>†</sup> 7:30 Iyo 4:50-51

<sup>32</sup> Ada wadedeku-deya kaliva seyana tagana kuluna ada meyana gidalu ani ialiyena Yeisu wagaine. Ada ialamamaiyena vaita nimana ginasena wagaine ke gina kiveiwakanena.

<sup>33</sup> Ada Yeisu kaliva giabi ginauwena maita tabae aku yoo gisegegi, ada nimadidina gisedi tagana wagaidiya e ayo nimadidi gikiwalidi ke gisedi kaliva meyana wagaine.

<sup>34</sup> Ada giitalaka gabameya ke giluyawai aku givona, "Efata!" Vona taidei anakivila, 'Gina ayavuni!'

<sup>35</sup> Ada maduga-mowa kaliva tagana giafoledi ada giifufu dewadewa.

<sup>36</sup> Ada Yeisu kaliva giawatadi keke tamo gaito inavone, aku auwe badi iifuifufuyedadanena kaliva wagaidiya. Tova ke tova giawaawatadi aku auwe badi ikwagekwageye-moena.

<sup>37</sup> Ada badiyavo gavega valeya-nai inogalina ani meyadi gisidobodobona lakaina ada ivonaga, "Yana gugai matatabuna iwakadi! Badi tagadi kuludi inoganogala ke gaugaudiyavo iifuifufu!"

## 8

*Yeisu kaliva fowa tausani (4,000) givekanidi.*

*Mad 15:32-39*

<sup>1</sup> Tayuwe tova-nai wagaine, aimo kaduwe seyana yoo lakaina ivagauta Yeisu wagaine. Ada imiyamiya aku adiga giavaina, e ada Yeisu yana tonogalayavo gidouwedi ielai, ada givonedi, givona,

<sup>2</sup> "Yoo taidei ganuwakalikaliyedi, faina tova malinai bademowa yadayada toiye nodi

kamiyamiya ada keke tamo aa gidatufu ayo inakani.

<sup>3</sup> Kai wa mafalavugidiyavo gana imilidi inayewa yadi melaleya aga aimo waiya inaala. Faina tufodi atuwadeya ielai.”

<sup>4</sup> Yana tonogalayavo ilufata, “Ida mwatugu kavovona wagaine kamiyamiya. E ada gadedeku aa kanavai ayo yoo taidei kana vekanidi?”

<sup>5</sup> Yeisu gitolidadanedi, “Gavaiyei beledi wa-gaimiya?”

Badi ivona, “Beledi seveni idauwe.”

<sup>6</sup> Ada yoo givonedi ke ivetoga babi wagaine aku beledi seveni givaidi ke givona vesiule Yaubada wagaine. Muliya gikiineinedi ke giveledi yana tonogalayavo ina vutugena yoo wagaidiya.

<sup>7</sup> Ada kaduwe badi wagaidiya igana kabisodi toiye, ani Yeisu givaidi ke givona vesiule faidiya, ada tonogalayavo givonedi kaduwe ina vutugena.

<sup>8</sup> Ada moyaidi ikani ke adifaiweya matatabudi, ada mukumukuna aditufu ivagauwina ada fuwama seveni ivemagadi.

<sup>9</sup> Ada kaliva-dina adiyoo anafaiweya fowa tausani (4,000). Ada Yeisu giimilidi iyewa.

<sup>10</sup> Aku maduga-mowa yana tonogalayavo nodi waka wagaine iyage ada inau Dalimanuta anafafali wagaine.

*Kaliva Yeisu iveolena ada gugai ebameyasido-bodobo gida faisewana.*

*Mad 16:1-4*

<sup>11</sup> Aku Falisiyavo tufodi ielai ada ivebutu Yeisu nodi ivevonavona. Nuwanuwadi ina galuvaluvana faina, iveolena ke gugai

ebameyasidobodobo seyana Yaubada wagaine gida faisewana.

<sup>12</sup> Ada Yeisu giluyawai lakaina aku givonedi, “Gavana faina imi tova malinai anakaliva nuwanuwami iyaiyaya ebameyasidobodobo? Gavonemi velemoena, keke tamo iyaiyaya wana nuwaga.” †

<sup>13</sup> Ada gisegedi aku giyage-vagila waka wagaine ada idamana lavu fafaline.

*Falisiyavo ada Elodi yadi vewala ani vaita falawa anayisti anafaiweya.*

*Mad 16:5-12*

<sup>14</sup> Aku tonogalayavo nuwadi givulu ada keke tamo beledi idavai awaga faina, aku beledi seya-moena gitufu waka wagaine.

<sup>15</sup> Ada Yeisu givonamatawedi, givona, “Tau-miyavo wana itaveyabimi badi Falisiyavo ke Elodi adifalawa anayisti wagaine.” †

<sup>16</sup> Ada badi tonogalayavo ivebutu taudiyavo gaga wagaidiya ivonavona, ivona, “Taidei anafai-weya givona, faina keke tamo beledi kada aliye.”

<sup>17</sup> Aku Yeisu yadi nuwanuwa gialamanena e ada givonedi, givona, “Gavana vuvuna waveifui-fufu amibelede keke wadavai faina? Gavaiyamu, aimo keke wadaita ke wada alamane, ada aimo keke nuwami gidamali?† Aseasemi gikuga ani gavana vuvuna?

<sup>18</sup> Imi wa matami aku kai keke wadaita? Ada kaduwe wa tagami aku kai keke wada nogali? Ada gavaiyamu, kai keke amifata wana nuwaududu?

---

† 8:12 Mad 12:38-39, Luk 11:16, 11:29 † 8:15 Luk 12:1 † 8:17 Mak 6:52

19 Tova-nai beledi faifi gakiineinena kaliva faifi tausani (5,000) faidiya, ani mukumuku wagaine gavaiyei fuwama wavemagadi?"

Ada ivonena, "Tuwelo."

20 Bana givona, "Kaduwe beledi seveni gakiineinedi kaliva fowa tausani (4,000) faidiya, ani mukumuku wagaine gavaiyei fuwama wavemagadi?"

Ada ivonena, "Seveni."

21 Yeisu givonedi, "Gavaiyamu-yo aimo keke nuwami gidamali?"

*Bedesaida-deya Yeisu kaliva matana koyo-moena gikiveiwakanena.*

22 Ada melala Bedesaida wagaine ielai aku kaliva tufodi ani kaliva seyana matana koyo-moena ialiyena Yeisu wagaine, ada ialama-maiyena vaita nimadidina gidasedi bana wagaine.

23 Yeisu kaliva-nai matana koyo-moena nimane gikiveyabina ada melala-nai wagaine iyegemona ke inau wamelaleya. Ada wadedeku-deya Yeisu kaliva-nai matana gikiwalidi ada nimana gisedi kaliva wagaine aku gitolidadanena, "Gavaiyamu, afaiweya gavana tamo una itana?"

24 Ada kaliva-nai giitadadana ada givona, "Kaliva gaitaitadi aku adiita vaita ai ida nunudadana anafaiweya."

25 Ada Yeisu nimana gisevagiledi kaliva matane, ada kaliva-nai matana gimalina ke gaitoma matatabuna giita-dewedewedi velemono.

26 Ada Yeisu kaliva-nai givonena, “Keke una yewani melala wagaine aku unanau ya manuweya.”

*Pita giawamogatalena Yeisu ani Bana Keliso.*

*Mad 16:13-20; Luk 9:18-20*

27 Ada Yeisu yana tonogalayavo nodi inau melala-dina Sisalia-Filipai anafafali wagaidiya. Ada wai wagaine inaunau aku yana tonogalayavo gitolidadanedi, givonaga, “Wana voneku, gavaiyamu kaliva ivonavona evona vaita Iya gaito?”

28 Badi ivonena, “Tufodi ivona vaita Oye Iyoni Tobabitaizo, aku tufodi ivona vaita Oye falofita Ilaitiya, kaduwe tufodi ivona vaita Oye tova tuwaina anafalofita seyana.”

29 Ada kaduwe gitolidadanedi, givona, “Aku imiyavo, gavaiyamu wavonavona, evo Iya vaita gaito?”

Ada Pita gilufata, “Oyeni ani au Mesaiya.” †

30 Yeisu vona-nai giluyabuna, ada veimeya toyogina givedi, givona, “Keke tamo gaito wagaine wana awatalatalaina faikuya.”

*Yeisu yana uloulolo ke yana alika faina givonaye-vagaina.*

*Mad 16:21-23; Luk 9:21-22*

31 Ada givebutu yana tonogalayavo givewaledi, givona, “Banae Kaliva Natuna anaveimeya givaina ke gaitoma moyaina gina uloloyedi kaliva nimadiya. Badi meIsileli yadi kaliva lakaidiyavo, ke Yaubada yana veyavo anatovegugai lakaidiyavo, kaduwe veimeya anatovewalayavo,

---

† 8:29 Iyo 6:68-69

ani nodi ina awaididiyena. Ada ina luvealikana, aku yadayada anaveto wagaine alikeya ginayawa-vagila.”

<sup>32</sup> Yeisu yana vona-dina gikivemalina velemono wagaidiya, aku bana Pita ani Yeisu givagaule ginauwena tabae ada givebutu giduweyena.

<sup>33</sup> Aku Yeisu gimiyavilana ada yana tonogalayavo giitadi aku giduweyena Pita, givona, “Seitani, una segeku unanau tabae! Ida ya nuwanuwa ani keke Yaubada yana nuwanuwa anafaiweya, aku kaliva-mowa yadi nuwanuwa.”

*Yeisu anamuliya faina vita kana nuwagana.*

*Mad 16:24-28; Luk 9:23-27*

<sup>34</sup> Ada Yeisu yana tonogalayavo ke yoo nodi gidouwedi, ada ivagauta wagaine aku givonedi, “Badi gavega nuwanuwadi inaela ina muliyeku, ani gilubodana taudiyavo yadi nuwanuwa ina dibusoyogedi aku taudiyavo adikelose ina avalana ke ina muliyeku.†

<sup>35</sup> Faina badi gavega nuwanuwadi taudiyavo yawaidi ina kibababaledi, ani yawaidi ina nusegedi. Aku gavega yawaidi ina nusegena Iya faikuya ke valeya iwakana faine, ani yawaidi ina kibababaledi.†

<sup>36</sup> Faina kai gavega babi anagiba matatabuna inavai-yabudi aku taudiyavo yawaidi adikibababala-vagata ida nusegedi, aga gavana anaiwakana? Au keke.

---

† 8:34 Mad 10:38, Luk 14:27    † 8:35 Mad 10:39, Luk 17:33

37 Kai yawaidi adikibababala-vagata ina nusegena, aga keke tamo fatana anafaiweya inasei ayo yawaidi kaduwe ina nuwaga.

38 Ada kai badi gavega Iya faikuya ke yaku vona faina ina vovomumu ke ina veweyeku tova malinai anakaliva koyodiyavo ke udoudodiyavo matadiya, aga aimo kadu Banae Kaliva Natuna gina vovomumuyedi ke gina veweyedi.† Taidei gina yegemona tova-nai ginaelai Tamana yana iwakana mamalina wagaine ada yana anelose tabutabudiyavo nodi.”

## 9

1 Ada kaduwe Yeisu givonedi, givona, “Gavona velemoena wagaimiya, tufomi idedeku wamidimididi ani aimo keke alika wanamadu lutovoni, aku nagona wana itana Yaubada yana ehaveimeya wa yana toyogina gina yegemona.”

*Yeisu anaita gisevedavedama.*

*Mad 17:1-13; Luk 9:28-36*

2 Ada yadayada sikisi giavaidi, Yeisu yana tonogalayavo aditoto Pita ada Iyemesa ke Iyoni givagauledi ada nodi ilaka oya lakaina wagaine. Ada wadedeku-deya adilo matadiya aku Yeisu anaita gisevedavedama.†

3 Ada ananuya gikwayafofolidi ke gilunamamaledi, ani keke tamo gaito babi matatabuna wagaine ginakola anaita anafaiweya.

4 Ada aditoto matadiya aku Yaubada yana kali-vayavo adiselu tova tuwaina wagaine imiyamiya,

---

† 8:38 Mad 10:33 † 9:2 2Pi 1:17-18

tainei Mosese kadu Ilaitiya, ani iyegemona ada Yeisu nodi iifuifufu.

<sup>5</sup> Ada au Pita Yeisu givonena, “Labai,\*\* ida iwaka-moena faina ime nodi idedeku. Ada vada toiye ana yogodi, seyana O fainiya, seyana Mosese faine, kaduwe seyana Ilaitiya faine.”

<sup>6</sup> Taidei anafaiweya givona faina keke gida alamane gavana gina vonaye, e ada givona-kavokavovo. Faina tubuiyanavo nodi imatautamowa.

<sup>7</sup> Ada buibui giyegemo ke gibwatavudi, ada bonabona giyegemona buibui wagaine-deya, givonaga, “Taidei ani Iya Natu aseaseku. Bonana wana nogalina.” †

<sup>8</sup> Ada maduga-mowa iitadadana vaita gaito nodi ida itana aku keke, au Yeisu anakaibe-mowa.

<sup>9</sup> Ada itauya oyeya-deya iobuobelai aku Yeisu giveimeyedi, givona, “Gavana waitana ani keke seyana gaito wana vonevone analaba Banae Kaliva Natuna ginayawa-vagila alikeya. Aku muliya ani iwakana, wana awamogatalena.”

<sup>10</sup> Ada yana veimeya imuliyena ke taudiyavo gaga wagaidiya ikavuyena, aku taudiyavo ivetoli-toli ‘alika muline yawa-vagila’ anaalamana faina.

<sup>11</sup> Ada Yeisu itolidadanena, “Gavana faina veimeya anatovewalayavo ivona vaita gilubodana Ilaitiya gina maduelai aku muliya Mesaiya ginaelai?” †

---

\*\* **9:5** Vona-nai ‘labai’ anaalamana ani banae bade Yaubada yana veimeya faidiya gisikulu lakaina. Ada meIsileli moyaidi iinanana vaita banae tovewala lakaina. † **9:7** Mad 3:17, Mak 1:11, Luk 3:22, 2Pi 1:16-18 † **9:11** Mad 11:14

12 Ada Yeisu gilufata, givona, “Ina vona velemoena, Ilaitiya gina maduelai ke gaitoma matatabuna gina sedewedewe-vagiledi.† Aku gavana faina Buki Tabu wagaine ivona vaita Banae Kaliva Natuna aimo gaitoma moyaidi gina ulouloloyedi lakaina, ada kaliva ina awaididiyena?†

13 Aku Iya gana vonemi, Ilaitiya bademowa gielai, ada gavana anafaiweya kaliva yadi nuwanuwa koyona ani igugaiyena wagaine. Tainei anafaiweya Bana faine Veyavo Anawai Tuwaina anaBuki wagaine ivetokilumina.”

*Kwamana seyana aluwaluwa koyona nafone gimiyamiya ani Yeisu gikiveiwakanena.*

*Mad 17:14-21; Luk 9:37-43*

14 Ada Yeisu yana tonogalayavo aditoto nodi oyeya-deya iobuelai, inuwagadi tonogala velugadiyavo yoo lakaina nodi, ani Mosese yana veimeya anatovewalayavo nodi ivevonavona.

15 Aku kaliva moyaidi Yeisu iitana wagaine itataweyana, ada imadubodebode inau Bana wagaine.

16 Ada Yeisu gitolidadanedi, givona, “Gavana wavevonavonaye nodi?”

17 Ada kaliva seyana yoo wagaidiya gilufata, givonaga, “Tovewala, natuku kaliva gaaliyena wagainiya, faina aluwaluwa koyona nafone gimiyamiya e ada natuku keke anafata gina ifufu.

18 Gavatoveya aluwaluwa-nai kwamana gina kidonedonena, aga gibaibaina babi wagaine aku awabugo gialaiwaiwagena. Kaduwe,

† 9:12 Mal 4:5    † 9:12 Ais 53:3

gikudaligoligota, ada vovona matatabuna iyaviyavivila ke giitaita-vagata. E ada ya tonogalayavo gaveoledi vaita aluwaluwa-nai ida veyegemonina, aku keke adifata.”

<sup>19</sup> Ada Yeisu givonediga, “Imi tova malinai anayooyavo ani yami vetumagana keke. Gavaiyei tova Iya nodi kana miyamiya? Gavaiyei tova gana atuvefailemi? Kwamana wana aliyena wagaikuya.”

<sup>20</sup> Ada kwamana ialiyena Yeisu wagaine. Aku aluwaluwa-nai giitana Yeisu wagaine, madugamowa kwamana gigai givetatava lakaina, ada gibeu babiya ke gienokalikaliwawa aku awane buwobuwo giyalaiwaiwaigena.

<sup>21</sup> Ada Yeisu kwamana-nai tamana gitolidadana, “Gavaiyei tova anafaiweya gidewa?”

Ada tamana givonaga, “Bebetane-deya givevuvu.

<sup>22</sup> Ada tova ke tova aluwaluwa-nai kwamana gibatubatugena ai alalata o kai gufeya, faina nuwanuwana gina luvealikana. Aku kai afaiweya aga uda nuwakalikaliyema ke uda lemema.”

<sup>23</sup> Ada Yeisu givonenaga, “Gavana faina uvona ‘Kai afata?’ Kai gaito wa yana vetumagana, aga gaitoma matatabuna meyameyaganina wagaine.”†

<sup>24</sup> Ada maduga-mowa kwamana tamana gitagivedavedadaga, givona, “Iya gavetumagana. Aku yaku vetumagana keke lakaina, e ada uda lemeku ke gida tubuga.”†

---

† 9:23 Mak 11:23    † 9:24 Luk 17:5

25 Aku Yeisu giitadi yoo imadu ielaelai wagaidiya, e ada aluwaluwa bwanebwanenena giawatana, givonaga, “Oyeni aluwaluwa koyona kwamana tagana ukivekuludi ke agona usebodana, gaveimeyeni una yegemona kwamana wagaine ada keke kaduwe unaluku-vagila wagaine.”

26 Ada aluwaluwa koyona gikwekwela ke kwamana gigai givetatava lakaina aku giyegemona. Ada kwamana anaita vaita gida alika, e ada moyaidi ivonaga, “Wada bademowa gialika.”

27 Aku Yeisu kwamana-nai nimane gikiveyabi ke gisivemididina, ada gimididi.

28 Ada muliya Yeisu giluku seyana manuwa wagaine e au adiloigaga, aku yana tonogalayavo itolidadanena, ivonaga, “Gavaiyamu-yo ime keke amafata aluwaluwa koyona ana veyegemoni?”

29 Ada gilufata wagaidiya, “Taine aluwaluwa koyona-nai ada badi kadu banae anafaiweya ani yadi toyogina lakaina, e ada veoveola gaga wagaine\*\* ada Yaubada gina veyegemonidi.”

*Yeisu yana alika ke yana yawa-vagila faina kaduwe giifufu.*

*Mad 17:22-23; Luk 9:44-45*

30 Ada Yeisu yana tonogalayavo nodi fafalinai isegenaku igolota Galili wagaine. Keke nuwanuwana kaliva ina alamane gadedeku imiyamiya,

---

\*\* 9:29 Kaliva tufodi tuwai-moena Buki Tabu ivetokilumi-vedamana ani taide maita-nai wagaine vona ivetutamwaina taidei anafaiweya: “e ada kai kani kana ilovau aku au kana veoveola aga Yaubada gina veyegemonidi.”

<sup>31</sup> faina yana tonogalayavo givewavewaledi. Givona, “Banae Kaliva Natuna ani ina atuegena kaliva nimadiya ada ina luvealikana. Aku yadayada anaveto wagaine ginayawa-vagila alikeya.”

<sup>32</sup> Aku yana vona-nai faina ani keke nuwadi gidamali e aku anatolidadana imatausena.<sup>†</sup>

*Gaito anayegana lakai-moena Yaubada matane?*

*Mad 18:1-5; Luk 9:46-48*

<sup>33</sup> Ada ielai Kafaneumi wagaine. Ada tova-nai badi yana tonogalayavo nodi manuweya imiyamiya, Yeisu gitolidadanedi, “Gavana waiya wavevonavonaye?”

<sup>34</sup> Aku badi iveyamata, faina wai wagaine ivevonavona evona gaito wagaidiya anayegana lakai-moena.<sup>†</sup>

<sup>35</sup> Ada Yeisu givetoga aku tonogalayavo adi-tuwelo gidouwevagauwidi ke givonedi, givona, “Badi gavega nuwanuwadi ina vetonagona, aga gilubodana ina vetomuliya ada ina vetogugai moy-aidi wagaidiya.”<sup>†</sup>

<sup>36</sup> Ada kwamana kabisona giabi gialiyena ke tonogalayavo nefanidiya givemididina, ada ni-mana avalane gisena aku givonedi, givona,

<sup>37</sup> “Badi gavega kwamana taidei anafaiweya akuyeganeya isivaivaina, ina Iya kadu isivaivaiku. Ada gavega Iya isivaivaiku, ina keke Iyayeku gaga ida sivaivaiku aku Banae giimiliku kadu isivaivaina.” <sup>†</sup>

---

<sup>†</sup> **9:32** Luk 18:34    <sup>†</sup> **9:34** Mad 18:1, Luk 9:46, 22:24-27    <sup>†</sup> **9:35** Mad 20:26-27, 23:11, Mak 10:43-44, Luk 22:25-26    <sup>†</sup> **9:37** Mad 10:40, Luk 10:16, Iyo 13:20

*Gaya kaliva keke nibaida, banae adatoleme.*

*Luk 9:49-50*

<sup>38</sup> Ada Iyoni givonenaga, “Tovewala, ime kaliva aitana ani ayeganeya aluwaluwa koyodi giveveyegemonidi. Aku banae keke yada yoo wagaine, e ada aawatana.”†

<sup>39</sup> Ada Yeisu givona, “Keke wana awata, faina kai seyana gaito akuyeganeya gugai ebameyasi-dobodobo gigugaiyedi, aga banae aimo keke anafaiweya ginamadu awavekoyoyeku.

<sup>40</sup> Faina badi gavega keke ida venibaineda ani badiyavo adatoleme.†

<sup>41</sup> Ada gavonemi velemonoena, badi gavega gufa ina veyumi faina imiyavo Keliso yana yoo, fatadi iwakana ina nuwagana.†

*Keke koyona wagaine kaliva kana vebeudi.*

*Mad 18:6-9; Luk 17:1-2*

<sup>42</sup> “Aku kai kwamana seyana anafaiweya taidei givetumaganeku aku dewa koyona wagaine wanagai yana vetumagana wagaikuya gina segena, aga amimatavuloga vita-moena wana nuwagana Yaubada wagaine. Ebaita ganasena. Kai kabala lakaina ina yogovefosena odomiya ada wa kabalimi ina vekamomolimi leyageya wana alika, tainei vitana. Aku kai matavuloga Yaubada wagaine wana nuwagana, tainei vita-moena.

<sup>43-44</sup> E ada kai nima seyana gina sitaitaini ke una koyokoyona, aga au una dabayavule una segena. Auwe wa nima seya-moena aku unamiya wa ya dewa iwakana ada unaluku

---

† 9:38 Naba 11:27-29 † 9:40 Luk 11:23 † 9:41 Mad 10:42

yawai-vagata wagaine. Ina iwaka-vagaina ayo kai wa nima iluwei aku wa ya dewa koyona ani unaluku eli anaai alalata keke gida weuwe wagaine.

<sup>45-46</sup> Kaduwe, kai age seyana gina sitaitaini ke una koyokoyona, aga au una dabayavule una segena. Auwe wa age seya-moena faina felafela aku unamiya wa ya dewa iwakana ada yawai-vagata wagaine unaluku. Ina iwaka-vagaina ayo kai wa age iluwei aku wa ya dewa koyona ani ina batugeni unaluku eli wagaine.

<sup>47</sup> Ada kai mata seyana gina nagoyeni ke una koyokoyona, aga au una etomwamwali una segena. Auwe wa mata seya-moena aku wa ya dewa iwakana unamiya ada unaluku Yaubada yana ehaveimeya wagaine. Ina iwaka-vagaina ayo kai wa mata iluwei aku wa ya dewa koyona ani ina batugeni unaluku eli wagaine,

<sup>48</sup> wadedeku

'kaliva vovodi adimotamota itugatugadi  
ani motamota-dina keke ida alialika,  
ada kaduwe ai alalata keke gida weuwe.'†

<sup>49</sup> Aku imi yaku tonogalayavo ani moyaimi wagaimiya vita tulina tulina vaita ai alalata anafaiweya ina yegemona ke ina alailuvaluvami. E ada kai yami dewa vaita leyaga iwakana anadigadigaga anafaiweya o kai keke, ani gina seyegemonena. Taidei gina lememi ke wana veasekumaga.

<sup>50</sup> Leyaga gaitoma iwakana, aku kai leyaga

---

† 9:48 Ais 66:24

anadigadigaga gina avaina, aga keke anafata kana kiveleyagi-vagile. Aku leyaga yegayegana anavegugai ani iwakana kaliva wagaidiya, ada kadu anafaiweya imiyavo wana dewadewa iwakana.<sup>†</sup> Kaduwe kukuya wagaine wana miyamiya.”

## 10

*Yeisu giifufu viyolili faina.*

*Mad 5:31-32, 19:1-12; Luk 16:18*

<sup>1</sup> Ada Yeisu Kafaneumi gisegena aku ginau Yudiya anafafali wagaine ke gidamana gufa Yol-idani fafaline. E au yoo lakaina kadu ivagauta Bana wagaine, ada yana dewa tova moyaina anafaiweya, kaduwe givewavewaledi.

<sup>2</sup> Aku Falisiyavo tufodi ielai Yeisu wagaine. Nuwanuwadi ina galuvaluvana e ada itolidadana, ivona, “Gavaiyamu, adaveimeya giawae-gau vaita kaliva vavinena gina viyoliliyedi?”

<sup>3</sup> Ada Yeisu gilufata, givonediga, “Aku gava veimeya Mosese givilemi?”

<sup>4</sup> Ada Falisiyavo ivona, “Mosese giawaegau kai gavakaliva nuwanuwana vavinena gina viyoliliyedi, aga viyolili anamatawa gina vetokilumina ada vavinena gina veledi ayo muliya gina imilidi inanau.”<sup>†</sup>

<sup>5</sup> Aku Yeisu givona wagaidiya, givona, “Imi aseasemi kugadi faina, nuwanuwami taumiyavo yami edaeda wagaine wana gugai. Taidei faina Mosese veimeya tainei givetokilumina faimiya.

---

<sup>†</sup> **9:50** Mad 5:13, Luk 14:34-35, Kol 4:6    <sup>†</sup> **10:4** 2Vei 24:1

<sup>6</sup> Aku velemonoena ibubuna vaguvagu anatova wagaine-deya, ani 'Yaubada kaliva ke vavine gibubudi.' †

<sup>7</sup> 'Taidei faina kaliva inana ke tamana gina miyasegedi, aku ginanau ada vavinena nodi ina miyaluga

<sup>8</sup> ke adiselu ina vevovo seyana.' Nagona adiselu imiya tulina tulina ada anaita ani iluwei, aku malinai iveseyana.†

<sup>9</sup> Taidei faina, gavana Yaubada giavina ke givemiyalugedi, ani keke tamo gaito gida vemiyadakadi."

<sup>10</sup> Ada muliya Yeisu yana tonogalayavo nodi inau manuweya aku tonogalayavo itolidadanena viyolili faina.

<sup>11</sup> Ada givona wagaidiya, givona, "Gavakaliva vavinena gina viyoliliyedi aku vavine evaguna gina nagina, wada giudo wagaidiya.†

<sup>12</sup> Ada anafaiweya kai vavine moganena gina viyoliliyena aku kaliva evaguna gina nagina, wada kaduwe giudo."

*Yeisu biyabiyama ginuwakabubuyedi.*

*Mad 19:13-15; Luk 18:15-17*

<sup>13</sup> Ada kaliva tufodi biyabiyama ialiyedi Yeisu wagaine ada vaita nimana ginasena wagaidiya ke gina awanuwakabubuyedi, aku tonogalayavo iawatadi.

<sup>14</sup> Ada Yeisu giitana wagaine, keke gida vemwamwala e ada yana tonogalayavo giduweyedi, givonediga, "Keke biyabiyama wana awatadi aku wana awaegedi inaelai

---

† 10:6 Eba 1:27    † 10:8 Eba 2:22-24, Efes 5:31    † 10:11 1Kol 7:10-11

wagaikuya, faina Yaubada yana ebaveimeya anakalivayavo ani taide biyabiyama-dina anafaiweya.

<sup>15</sup> Gavona velemonoena wagaimiya, kai gaito keke gina awaege Yaubada gina veiveimeya aseasene vaita kwamana kabisona anafaiweya, aga keke-bamowa ginaluku Yaubada yana ebaveimeya wagaine.”†

<sup>16</sup> Ada biyabiyama-dina giwaidi ada nimana gisena seyana seyana wagaidiya ke giawanuwak-abubuyedi.

*Tokaikaiwabu tubulakaina Yeisu gitolidadana yawai-vagata faina.*

*Mad 19:16-26; Luk 18:18-27*

<sup>17</sup> Ada wadedeku-deya Yeisu gitauya ginanau, aku kaliva seyana gimadu gielai ada tugana givetodonena Bana matane aku gitolidadanena, givona, “Tovewala iwaka, gavana analauboda ganagai ayo yawai-vagata gana nuwaga?”

<sup>18</sup> Ada Yeisu gilufata, “Gavana faina uvona Iya iwakaku? Keke tamo gaito iwakana aku Banae Yaubada anakaibe-mowa.

<sup>19</sup> Aku yana veimeya bademowa ualamanena, ‘Keke una luvealika, keke unaudo, keke una kiyafu, kaliva yadi gugai faidiya keke una awatalatalaina fwayafwaya, keke kaliva una fwayadi aku yadi giba una vaidi, ada kaduwe ina ke tama una vemoimoinedi.’ ”

<sup>20</sup> Ada kaliva-nai givona, “Tovewala, yaku tova kwamana wagaine-deya gavebutu veimeya-dina taidei matatabuna gaitaveyabidi ada gielai malinai.”

---

† 10:15 Mad 18:2-3

<sup>21</sup> Ada Yeisu kaliva-nai giitana ke ginuwakabubuyena ada givonena, “Gaitoma seya-moena wagaine o uvemaufu. Unanau ya lokoloko matatabuna una vekimoneyedi ke manina una veledi fanifani, e ada kaikaiwabu velemoena gabameya una nuwagana. Ada unaela una muliyeku.”

<sup>22</sup> Aku kaliva vona taidei ginogalina, ada au magigina gikokomina ke wa yana nuwavita nodi gitauya ginau, faina banae tokaikaiwabu lakaina.

<sup>23</sup> Ada Yeisu giitadadana ada yana tonogalayavo givonedi, “Badi tokaikaiwabu yadi luku Yaubada yana ebaveimeya wagaine, ani au vitana velemoena.”

<sup>24</sup> Aku tonogalayavo meyadi gisidobodobona yana vona faina. Aku kaduwe Yeisu givonedi, “Natukuweyavo, Yaubada yana ebaveimeya analuku ani vitana velemoena!

<sup>25</sup> Wana itana, kevakeva lakaina anayegana kameli ani kai gina balalava ada vaita gaima matana wagaine gina lukufolega ani gavaiyamu, anafata? Keke. Ada tokaikaiwabu ani ananuwanuwa anafaiweya. Kai badi taudiyavo yadi toyogina wagaine ina balalava ke Yaubada yana ebaveimeya wagaine inaluku, ani ina balalava-wayoga.”

<sup>26</sup> Ada Yeisu yana vona taidei faina, yana tonogalayavo meyadi gisidobodobona lakaina ke ivetolitolitoli taudiyavo wagaidiya, ivona, “Kai taidei anafaiweya, aga gaito anafaiweya kibababala gina nuwaga?”

<sup>27</sup> Ada Yeisu giitafasedi aku givonedi, givona, “Kaliva wagaidiya ani gaitoma taidei keke maita

meyameyaganina, aku Yaubada wagaine ani keke anafaiweya. Faina Banae wagaine gaitoma matatabuna meyameyaganina.”

<sup>28</sup> Ada Pita givonena, givonaga, “Una itana, ime gaitoma moyaina asegedi ada aela O amulimuliyeni.”†

<sup>29</sup> Ada Yeisu givona, “Gavonemi velemona, badi gavega inuwanuwa Iya faikuya ke valeya iwakana faina, e ada yadi manuwa isegedi o kai tubuiyadiyavo o novudiyavo, kai inadi o tamadi o natudiyavo, kai yadi babi isegedi,

<sup>30</sup> ani badi tova malinai gaitoma-dina fatadi analedi wa anavetutamwata ina vaina, anafaiweya manuwa, tubuiyadiyavo, novudiyavo, inadiyavo, natudiyavo, ada yadi babi. Kaduwe yadi awaega Iya wagaikuya faina, uloulolo ina nuwagana kaliva nimadiya. Ada aimo tova gielaelai waganine yawai miyamiyani-vagaina ina nuwagana.

<sup>31</sup> Aku moyaidi tova malinai wai inagonagona ani aimo tova gielaelai wai ina muline-mwena, aku badi gavega malinai wai imuli-mwena ani aimo tova gielaelai wai ina nagona.”†

*Tova anaveto Yeisu yana alika faina giifuifufu.  
Mad 20:17-19; Luk 18:31-34*

<sup>32</sup> Ada Yeisu ginagoyedi ke ilakalaka Yelusalema aku yana tonogalayavo meyadi gisidobodobona,\*\* ada yoo nodi imuliyena ani

---

† **10:28** Mak 1:16-20, Luk 5:28    † **10:31** Mad 20:16, Luk 13:30

\*\* **10:32** Yeisu yana tonogalayavo meyadi gisidobodobona faina Yelusalema wagaine kaliva tufona moyaidi Yeisu ivenibainena.

imatauta.\*\* Ada yana tonogalayavo adituwelo kaduwe givoned ielai wagaine ke gimatawedi aimoina gavana gina yegemo Bana wagaine faina.

<sup>33</sup> Ada givonediga, “Wana nogalina. Ideyavo kalakalaka Yelusalema, ada Banae Kaliva Natuna ina atuegena veyavo anatovegugai lakaidiyavo ke veimeya anatovewalayavo nimadiya, ada ina veimeya analuvealika faina. Ada muliya inasena badi keke meIsileli nimadiya.

<sup>34</sup> Ada badiyavo ina awaveleigena, ina kiwalina ke ina lubibiwalina, ada ina luvealikana. Aku yadayada anaveto wagaine ginayawa-vagila alikeya.”

*Iyemesa ke Iyoni yadi veola.*

*Mad 20:20-28*

<sup>35</sup> Aku tova-nai wagaine Iyemesa ke Iyoni, badiyavo Sebedi natunavo, ani Yeisu wagaine ielai ada ivona, “Tovewala, nuwanuwama gavana ana veoleni aga uda gugaiyena faimeya.”

<sup>36</sup> Ada gitolidadanedi, “Gavana nuwanuwami ganagai faimiya?”

<sup>37</sup> Ada ilufata, “Uda awaegema ke aimo tova-nai wa ya iwakana mamalina una veiveimeya, ani ime amaiselu lilivaniya ada vetoga. Seyana aiy-ataginiya ke seyana aimauliniya.”

<sup>38</sup> Aku Yeisu givona wagaidiya, givona, “Gavana waveola faine ani ananuwanuwa keke wada alamane. Gavaiyamu, aimo uloulolo anavei-nai wagaine ganayuga ani

---

\*\* **10:32** Yoo-nai Yeisu imuliyena ani imatauta faina inuwanuwayena gavana meyameyaganina gina yegemo Yeisu wagaine.

imi amiselu amifaiweya wana yugena? Ada kaduwe babitaiso-nai wagaine gana babitaiso ani amifaiweya wagaine wana babitaiso?"†

<sup>39</sup> Badi adiselu ilufata, ivona, "Amafaiweya."

Ada Yeisu givona, "Vona velemono, vei-nai wagaine ganayuga ani kadu imi wanayuga.† Ada babitaiso-nai wagaine gana babitaiso ani imi kaduwe wagaine wana babitaiso.

<sup>40</sup> Aku gaito aiyatagikuya gina vetoga ke gaito aimaulikuya, ina Iya keke yaku ehaveimeya, aku badi gavega Kamaku givenuwadadanedi ani faidiya gikidewedewena."

<sup>41</sup> Aku tonogalayavo aditeni inogalina wagaine, inuwakoyo Iyemesa ke Iyoni wagaidiya.

<sup>42</sup> Au Yeisu gidouwedi ivagauta wagaine ada givonedi, "Waalamanena badi keke meIsileli aditoveimeyayavo ani iveiveimeya toyogina yadi kalivayavo wagaidiya.

<sup>43</sup> Aku imiyavo ani keke anafaiweya wanadewa. Aiyada badi gavega nuwanuwadi taudiyavo adiyegana lakaina amimwatuguya, gilubodadi ina vetogugai moyaimi wagaimiya.†

<sup>44</sup> Ada badi gavega nuwanuwadi ina vetonagona, aga gilubodadi ina vetogugai yogoyogona moyaimi wagaimiya.†

<sup>45</sup> Faina Banae Kaliva Natuna giobuelai babiya, keke vaita kaliva ina gugai Banae faine, aku velemono ani Banae gina gugai kaliva faidiya ada yawaina gina awaegena ke gina nusegena moyaidi aditutuveobu faina."

† **10:38** Luk 12:50 † **10:39** Gug 12:2, Ive 1:9 † **10:43** Mak 9:35

† **10:44** Mad 23:11, Mak 9:35, Luk 22:25-26

*Batimiyo matana koyo-moena ani giita-vagila.  
Mad 20:29-34; Luk 18:35-42*

<sup>46</sup> Aku Yeisu yana tonogalayavo nodi inaunau aku melala anayegana Yeliko wagaine iyegemo. Ada melala-nai isege inaunau yoo lakaina nodi, aku kaliva seyana matana koyo-moena givetove-toga wai lilivane. Anayegana Batimiyo, bana Timiyo natuna. Tova moyaina banae mani faina giawaveoveola. \*\*

<sup>47</sup> Aku tova-nai ginogalina Yeisu kwana Nasaledi gielaelai, givebutu givedoudou moiyalina, givona, “Yeisu, Oye Deivida yana tubudelideli,<sup>†</sup> uda nuwakalikaliyeku!”

<sup>48</sup> Aku kaliva moyaidi Batimiyo iduweyena, ivona, “Auwe! Gina kulu-moeni!”

Aku bana keke. Bonana gilaka-mowa givedoudou, “Oye Deivida yana tubudelideli, uda nuwakalikaliyeku!”

<sup>49</sup> Ada Yeisu au ginumididi ke givona, “Wanavone ginaelai.”

Ada kaliva-nai matana koyo-moena idouwena ke ivonena, “Una vemwamwala ke una mididi un-aelai! Givedovedou fainiya!”

<sup>50</sup> Ada maduga-mowa ananuya badobadona giveyalilina aku gitowamididi gielai Yeisu wagaine.

<sup>51</sup> Ada Yeisu gitolidadanena, “Gavana nuwanuwa ganagai fainiya?”

---

\*\* **10:46** Tofanifani ke badi matadi ikoyo tufodi ani yadi dewa taidei anafaiweya. Tova moyaina ivetovetoga wai lilivane ada mani iawaveoveola adileme faina. <sup>†</sup> **10:47** Mad 9:27

Ada bana matana koyo-moena givona, “Labai, nuwanuwaku gadaita.”

<sup>52</sup> Ada Yeisu givonena, “Iwakana, unanau. Ya vetumagana bademowa gikiveiwakaneni.”† Ada maduga-mowa matana iveiwaka ada Yeisu gimuliyena wai wagaine.

## 11

*Yeisu giluku Yelusalema kini lakaina anafai-weya.*

*Mad 21:1-11; Luk 19:28-40; Iyo 12:12-19*

<sup>1</sup> Yeisu yana tonogalayavo nodi ilakalaka Yelusalema faina, aku nagona melala kabisodi Bedani ke Bedipegi wagaidiya inuyegemona, tainei Oya Olive dibune. Ada yana tonogalayavo adiselu giimilidi ke wai ina nagona,

<sup>2</sup> givonedi, “Imi wai wana nagona melala wadebaimiya wagaine, ada wana lukuluku ani wana nuwagana doniki natudi seyana isifona. Tainei kevakeva-nai evaguna, banae keke tamo gaito gidayage. Wana yavuna ada wana aliyena.

<sup>3</sup> Ada kai tamo gaito gina tolidadanemi, ginavona, ‘Gavana faina wayavuyavu?’ au wana vonena, ‘Kauveya gina vegugaiyena tufona yana faisewa wagaine, ada tova kabisona gina imili-vagile ginaelai.’ ”

<sup>4</sup> Ada adiselu inau ke doniki natudi inuwagana edawana lilivane isifona. Ada iyavuyavuna ani

<sup>5</sup> kaliva tufodi lilivadiya imidimididi ivona, “Gavana faina doniki wayavuyavu?”

---

† 10:52 Mak 5:34

<sup>6</sup> Ada Yeisu givona anafaiweya, adiselu ivonedi, ada wagaidiya iawaegena.

<sup>7</sup> Ada doniki-nai inauwena Yeisu wagaine ada adinuya badobadodi iyavelidi domone ke Bana giyage.

<sup>8</sup> Ada kaliva moyaidi yoo wagaidiya adinuya badobadodi iyavelidi waiya, aku tufodi ai lagadi wa lukudi ikuyadi ke wai wagaine isedi.

<sup>9</sup> Ada yoo tufodi wai inagona Yeisu debaine kaduwe tufodi wai imulina, aku moyaidi iawadavadavana bonadi lakaina, ivonavona, “Osana!\*\* Banae gielaelai KAUYEYA anayeganeya ani wa anaawanuwakabubu!†

<sup>10</sup> Tamada nagona Deivida yana ebaveimeya gielaelai ani Yaubada giawanuwakabubuyena! Osana tabone-mwane!”

<sup>11</sup> Ada Yeisu giyegemona Yelusalema ke ginau manawa tabu wagaine giluku. Giitadadana ke gaitoma moyaina giitadi negenine aku bade-mowa mala givelavilavi faina, Bana yana tonogalayavo adituwelo nodi iyewadi Bedani.

*Ai seyana anaita vaita alaa ani Yeisu gi-alatabutabuyena.*

*Mad 21:18-19*

<sup>12</sup> Mala gilavuna, imididi ada Bedani-deya iyewayewa-vagila Yelusalema aku Yeisu mafa gilavuna.

<sup>13</sup> Ada atuwadeya ai guwaguwa seyana anafaiweya alaa giitana, e ada ginau ke gina itana kai tamo guwana gina nuwagana wagaine. Aku luku

---

\*\* **11:9** ‘Osana’ anakivila ani ‘una kibababalema’. Aku vona-nai wagaine tova moyaina Yaubada idavadavana. † **11:9** Sam 118:26

gagana ginuwagana, faina anatutuya wagaine giyoyoyo ani aimo.

<sup>14</sup> Ada givona ai wagaine, givonaga, “Keke tamo tova kaduwe unaguwa-vagila ke kaliva wainiya inakani.” Ada vona taidei tonogalayavo inogalina.

*Yeisu manawa tabu gikiveyegayeganena.*

*Mad 21:12-17; Luk 19:45-48; Iyo 2:13-17*

<sup>15</sup> Ada ielai Yelusalema ada Yeisu gina giluku manawa tabu anafafali wagaine. Ada badi gavega ikimokimone ke ivevekimone ani giveyegemonidi, ada mani anatosevedavedama yadi teibeli gibwataviladi, ada kaduwe bunebune aditovedama yadi ebavetoga.

<sup>16</sup> Ada giawatadi keke seyana gaito giba-dina gina waidi gina nugolota manawa tabu wagaine.

<sup>17</sup> Ada givewavewaledi, givona, “Yaubada bonana ivetokilumina Buki Tabu wagaine givonaga,

‘Yaku manawa ani ina vewagana manawa ebaveoveola

babi anakaliva adiyoo moyaidi faidiya.’ †

‘Aku imiyavo wagana vaita tokiyafu yadi manawa.’ ” †

<sup>18</sup> Ada badi veyavo anatovegugai lakaidiyavo\*\* ke veimeya anatovewalayavo, ani Yeisu yana vona inogalina ada ivebutu wai ilele

† 11:17 Ais 56:7

† 11:17 Iyel 7:11

\*\*

11:18 Badiyavo Yaubada yana veyavo anatovegugai ani yadi faisewa taidei anafaiweya. Ioduodu Yaubada wagaine, Yaubada iveoveolena ke kaliva gida lemelemedi, vebolavoi anagugai igugugaiyena, ada Yaubada yana wai faina kaliva ivevewaledi.

ina luvealikana faina.† Aku imatausena, faina Yeisu yana vewala wagaine kaliva moyaidi meyadi gisidobodobona.

<sup>19</sup> Ada bademowa mala givelavilavi ada Yeisu yana tonogalayavo nodi Yelusalema isegeni.

*Ai-nai anaita vaita alaa ani gimayewana.*

*Mad 21:20-22*

<sup>20</sup> Ada mala gilavuna malabutuya iyewayewa Yelusalema wai-nai wagaine aku ai-nai Yeisu gi-alatabutabuyena ani iitana, bademowa ai-moena matatabuna gimayewana.

<sup>21</sup> Ada Yeisu yana vona ai wagaine ani Pita ginuwaududuna ada givonaga, “Labai, una itana! Ai-nai ualatabutabuyena ani bademowa gimayewana!”

<sup>22</sup> Ada Yeisu gilufata, givona, “Yami vetumagana wanasena Yaubada wagaine.

<sup>23</sup> Gavonemi velemono, gaito aseasene keke gida nuwakila, aku givetumagana vaita gavaiyamu ginavona ani anafaiweya gina yegemona velemono, ani kai oya taidei gina vonena, ‘Tauni una abuni ke unana leyageya una togaobu’, aga au anafaiweya gina yegemona bana faine.†

<sup>24</sup> Tainei faina gavonemi, gavana wana veoveola faine ani wana vetumagana vaita bademowa wanuwagana, ada gina yegemona anafaiweya. Wana nuwagana.†

<sup>25</sup> Kaduwe, gavatoveya Yaubada wagaine wana veoveola aku wana nuwaududuna seyana gaito gidewa koyona wagaimiya, aga

---

† 11:18 Mak 14:1    † 11:23 Mad 17:20, Luk 17:6    † 11:24 Mad 7:7, Iyo 14:13-14

wana venuwaegena. E ada Tamami gabameya imi kaduwe yami koyona gina venuwaegedi.<sup>†</sup>

<sup>26</sup> Aku kai kaliva yadi koyona wagaimiya keke wana venuwaegedi, aga kaduwe Tamami gabameya imi yami koyona keke gina venuwaegedi.”

*Yeisu yana veimeya vuvuna faina tonagonayavo itoliluveluvena.*

*Mad 21:23-27; Luk 20:1-8*

<sup>27</sup> Ada kadu iyewa Yelusalema. Ada Yeisu gina giluku manuwa tabu anafafali wagaine ginunudadana, aku veyavo anatovegugai lakaidiyavo ada veimeya anatovewalayavo ke kaliva lakaidiyavo ielai Bana wagaine.

<sup>28</sup> Ada itolidadanena, ivona, “Ida gava veimeya wagaine gaitoma-dina taidei ugugaiyedi? Gaito veimeya taidei giveleni-yo ugugaiyedi?”<sup>†</sup>

<sup>29</sup> Ada Yeisu givonedi, “Iya kadu toolidadana seyana gana toolidadanemi gaitoma seyana faine. Kai wana lufata wagaikuya aga Iya kaduwe gana vonemi gava veimeya wagaine gugai taidei gagugaiyedi.

<sup>30</sup> Wana voneku, Iyoni Tobabitaisto ani gaito veimeya givele ke kaliva gikivebabitaisodi? Yaubada o kaliva?”

<sup>31</sup> Ada taudiyavo iveifuifufuyena, ivona, “Gavaiyamu kanavona? Kai kanavona ‘Yaubada veimeya giveleni,’ aga ginavona, ‘E ada gavana faina Iyoni yana vona keke wada vetumagane?’

<sup>32</sup> Aku gavaiyamu, kai kadavona ‘Kaliva veimeya ivelena?’” Taidei anafaiweya ivona

---

<sup>†</sup> 11:25 Mad 6:14-15    <sup>†</sup> 11:28 Iyo 2:18

faina yoo imatausedi, faina ialamanena kaliva moyaidi ivetumagana vaita Iyoni banae Yaubada yana falofita seyana.<sup>†</sup>

<sup>33</sup> E ada ilufata Yeisu wagaine, ivona, “Keke ada alamane.”

Bana givona, “E ada Iya kadu keke gana vonemi gaito yana veimeya wagaine gaitoma-dina taidei gagugaiyedi.”

## 12

*Bakula anatoitaveyabina koyodiyavo adivona matalivulivuna.*

*Mad 21:33-46; Luk 20:9-19*

<sup>1</sup> Ada Yeisu vona matalivulivuna wagaidiya kaliva giifufuyedi, givona, “Kaliva seyana yana babi wagaine gileifi\*\* bulavadi analoi gibakulina. Bakula-nai gikalififina ada olu giyala giobu kabisona gileifi anaebavagafuwafuwa faina. Ada vada tulatulana giyogona e ada tofaisewa getane ina miyamiya aku matadi inasege ina nudadana bakula-nai anayavaga faina. Ada toni bakula gaitoma moyaina gibubudi giavaina, muliya kaliva tufodi nodi iveimeya ke bakula ina kidewedewena ada ina itaveyabina, aku ikolu anatoveya toni bakula-nai anavutuvutuga guwa ina velevelena. Aku tauna ani yana melala gisege ginau mali fafaliya gimiya.

---

<sup>†</sup> **11:32** Mad 21:46    \*\* **12:1** Taidei ‘gileifi’ ani gitabotabo seyana bulava giveveguwa wagaine, ada adilo i bakubakulidi bakula seyana wagaine. Guwana bikabikana ke vutona digadigagina. Gileifi guwana moyaidi ina vagafuwafuwadi ke vutona ina vaina ada waini ina faifaisewana.

<sup>2</sup> Ada imiyamiya aku gileifi anaikolu anatova giyegemona, ada tonibakula-nai yana togugai seyana giimilina ginanau bakula anatoitaveyabina wagaidiya vaita anavutuvutuga gileifi guwana gina vaina, anafaiweya gavaiyamu yadi awaegena tova-nai veimeya ibubuna wagaine.

<sup>3</sup> Ada togugai-nai ginau wagaidiya aku toitaveyabina ikiveyabi ilumalimaliwavuna, ada keke idavele aku makagekagena iimili giyewa.

<sup>4</sup> Ada kadu togugai anavelu giimilina toitaveyabina wagaidiya, aku banae kuluwana ilavuna ke idewa koyo-moena wagaine ada ikivevovomumuna.

<sup>5</sup> Kaduwe togugai anaveto giimilina wagaidiya, aku banae iluvealikana. Ada kadu muliya tufona moyaidi giimilidi wagaidiya, aku tufodi ilumalimaliwavudi aku tufodi iluvealikadi.

<sup>6</sup> Aku kaliva seya-moena gimiyaamiya, banae natu aseasena. Muline-mwane banae toitaveyabina wagaidiya giimilina, givona, 'Ida natuku, ada ina vemoimoinena.'

<sup>7</sup> "Aku natuna ani tova-nai giyegemona ada toitaveyabina-dina iitana, taudiyavo iveifuifufu, ivona, 'Ida tau-moena toni laova, ada aimo bakula taidei ginavai gina veimeyena. E ada wanaela kana luvealikana ada yana bakula kana vaina.'

<sup>8</sup> Ada au ikiveyabi iluvealikana ke itai iyegemona gileifi anabakula wagaine."<sup>†</sup>

<sup>9</sup> Yeisu yana vona matalivulivuna giluyabuna aku gitolidadanedi, givona, "E ada tonibakula-

---

<sup>†</sup> 12:8 Ibel 13:11-12

nai gavana ginagai? Vona velemoena kaliva-nai ginaelai ada bakula anatoitaveyabina-dina gina luvealikadi, aku gileifi anabakula-nai ani toitaveyabina evagudi nimadiya ginasena.

<sup>10</sup> Kai vona seyana Buki Tabu wagaine keke wada veyawa, givonaga,

‘Ogola-nai manawa toiyogona idibusoyogona ani

banae gimidinagona ogola velugadiyavo wagaidiya.

<sup>11</sup> Ida KAUYEYA yana gugai, ada matadeya ani iwaka-vagaina.’ ” †

<sup>12</sup> Ada meIsileli aditonagonayavo Yeisu yana vona matalivulivuna inogalina wagaine, nuwadi gimalina vaita badi faidiya givonavona. Tainei faina wai ilelena vaita ina kiveyabina, aku yoo imatausedi. E ada imadusege inau.

*Takesi anayaudi faina Yeisu itolidadanena.*

*Mad 22:15-22; Luk 20:20-26*

<sup>13</sup> Ada tonagonayavo iimilidi Falisiyavo tufodi ke Elodi yana kalivayavo tufodi, e ada yadi tolidadana wagaine Yeisu ina vebavuna ke vona gina sidamanena.

<sup>14</sup> Ada ielai Bana wagaine ivonena, “Tove-wala, ime aalamanena Oye uvonavona vele-moena. Keke uda vefwayafwaya. Ada kai kaliva anayegana lakaina o kai keke, keke uda nuwanuwa faine e ada keke uda venuwana gavaiyamu ina nuwanuwa, aku au Yaubada yana

---

† **12:11** Sam 118:22-23, 1Pi 2:6-8

wai faina uvevewala tunutunugina. E ada gavaiyamu, ide meIsileli adaveimeya Mosese wagaine, ani giawaegeda ada Sisa wagaine takesi kana lufata o kai keke? Takesi-nai kada fatana kai keke?”

<sup>15</sup> Aku Yeisu bademowa yadi meyalugaluga gialamanena, ada gitolidadanedi, givona, “Gavana faina wagalualuvaku? Nika, mani-nai wana aliye gana itana.”

<sup>16</sup> Ada mani-moena ialiyé ivelena. Bana gitolidadanedi, givona, “Gaito taidei anununa? Ada gaito taidei anayegana ivetokilumi?”

Badi ilufata ivona, “Sisa.”

<sup>17</sup> Banae givonedi, givona, “Gavana Sisa yana gaitoma aga wana vena Sisa,<sup>†</sup> aku gavana Yaubada yana gaitoma aga wana vena Yaubada.” Ada Yeisu yana vona taidei faina meyadi gisidobodobona.

*Yawa-vagila muline, nagi o keke?*

*Mad 22:23-33; Luk 20:27-40*

<sup>18</sup> Ada Sadusi tufodi ielai Yeisu wagaine, badi ivetumagana evona kaliva yadi alika muline keke inayawa-vagila.<sup>†</sup> Ada biyavo-dina itolidadanena ivona,

<sup>19</sup> “Tovewala, Mosese veimeya seyana give-tokilumina faideya givona, Kai kaliva seyana vavinena gina alikalovena aku keke tamo natuna, aga gilubodana kaliva-nai anatubuluga sikwana gina nagina, ada tubuiyana fatana faina natunavo gina vetubudi. Taidei wagaine ada toalika yana tubudelideli ina miyamiya.”<sup>†</sup>

---

<sup>†</sup> **12:17** Lom 13:7    <sup>†</sup> **12:18** Gug 23:8    <sup>†</sup> **12:19** 2Vei 25:5-6

<sup>20</sup> Ada ebaita ivelena, ivona, “Seyana kaliva anatubulugayavo nodi adiseveni. Ada tomoinagona ginagi ada natunavo keke aku gialika.

<sup>21</sup> Ada sikwana ani taina anavelu ginagina, ada natunavo keke aku gialika. Ada anafaiweya taina anaveto, natunavo keke aku gialika.

<sup>22</sup> Ada kaduwe anafaiweya tainavo matatabudi, sikwa-nai inagina ani ialika aku natudiyavo keke. Muline-mwane kadu vavine gialika.

<sup>23</sup> E ada yawa-vagila anatoveya ani gavakaliva vavinena? Faina adiseveni-dina vavine-nai inagina.”

<sup>24</sup> Aku Yeisu gilufata wagaidiya, givona, “Taidei yami sidamana, faina Buki Tabu keke wada alamane ada kaduwe Yaubada yana toyogina keke wada alamane.

<sup>25</sup> Faina tova-nai toalika inayawa-vagila, keke ina nagingi kadu keke ina vevenagi, aku au yadi miya vaita Yaubada yana aneloseyavo gabameya anafaiweya.

<sup>26</sup> Aku toalika yadi yawa-vagila faina, maita waveyawana Mosese yana buki\*\* wagaine o kai keke? Tova-nai Mosese fafali kavovona wagaine ginunudadana, aku ai kabisona giyabeyabela wagaine-deya Yaubada bonana giyegemona bana wagaine, givona, ‘Iya Ebelaamo yana Yaubada, Aisake yana Yaubada, ke Iyakobo yana Yaubada.’†

---

\*\* **12:26** Buki-dina Mosese givetokilumidi Buki Tabu wagaine ani taidei anafaiweya. Ebavevuvu, Iyegemona, Veimeya, Naba, ada Veimeya Anavelu. Ada vona Dobu ani Nugana, Si Apwesa, Loina, Numera, ada Loina ‘Eruena. † **12:26** Iyeg 3:2-6

27 Ada Yaubada ani keke kaliva alialikadiyavo yadi Yaubada, aku velemoena Banae ani kaliva wayawaidi yadi Yaubada. Ada imi yami vewala gaitoma taidei faina ani wasidamanena vele-moena.”

*Gava veimeya lakai-moena?*

*Mad 22:34-40; Luk 10:25-37*

28 Ada Mosese yana veimeya anatovewala seyana gielai wagaidiya ada yadi vevonavona ginogalina. Ada kaduwe Yeisu yana laufata iwakana ginogalina, e ada bana kaduwe gitolidadana Yeisu wagaine, givona, “Veimeya moyaina Yaubada Mosese givelena wagaidiya ani gava veimeya lakai-moena?”

29 Ada Yeisu gilufata, givona, “Veimeya lakai-moena taidei anafaiweya. ‘Imi meIsileli wana nogalina. Yada KAUYEYA Yaubada anakaibe-mowa.

30 Ada KAUYEYA Banae ya Yaubada una nuwakabubuyena asease matatabuna wagaine ke aluwaluwa matatabuna wagaine, kadu nuwa matatabuna wagaine ke ya toyogina matatabuna wagaine.’ †

31 Ada veimeya lakaina anavelu ani taidei anafaiweya. ‘Kaliva una nuwakabubuyedi o tauni unuwakabubuyeni anafaiweya.’ †Veimeya iluwei taidei, ani veimeya matatabuna itubusegedi.”

32 Ada veimeya anatovewala-nai Yeisu yana vona ginogalina ada givona, “Tovewala, ya vona tainei ani vona velemoena, faina Yaubada anakaibe-mowa ada keke tamo kaduwe.

---

† 12:30 2Vei 6:4-7 † 12:31 Vei 19:18, Lom 13:9-10, Gal 5:14

33 Ada gilubodana kana nuwakabubuyena aseaseda matatabuna wagaine, ke nuwada matatabuna wagaine, ke yada toyogina matatabuna wagaine. Ada kaduwe kaliva kana nuwakabubuyedi ide taudeyavo kanuwakabubuyeda anafaiweya. Faina kai taidei veimeya-dina kana itaveyabidi velemonoena, aga Yaubada matane taidei iwaka-moena ayo vebolavoi alaalai-yabudi ada velekaovo matatabudi kavelevelena.” †

34 Ada Yeisu kaliva-nai yana laufata wa yana nuwauya ani ginogalina wagaine, givonena, “Oyeni bademowa uvelilivana Yaubada yana ebaveimeya wagaine.” Ada tayuwe yadayadanai wagaine-deya, keke tamo gaito kaduwe gida asevatu ke Bana gida toolidadane. Au illovau.

*Mesaiya ani gaito natuna?*

*Mad 22:41-46; Luk 20:41-44*

35 Ada Yeisu manawa tabu wagaine givewave-wala kaliva wagaidiya aku givona, “Gavaiyamu-yo veimeya anatovewalayavo ivona evona Banae Mesaiya ani Deivida yana tubudelideli seyana?

36 Faina Aluwaluwa Tabuna yana kivetuvetunu wagaine Deivida tauna givona,

‘Banae KAUYEYA Yaubada ani Iya yaku Kau-veya

givonena, givona, “Aiyatagikuya una vetoga analaba nibaimomo gana seobuyedi ada yadi toyogina gina avaina velemonoena.”; †

---

† 12:33 Ose 6:6, Mai 6:6-8, Mad 9:13    † 12:36 Sam 110:1, Mad 22:43-44, Luk 20:42-43, Gug 2:34-35, Ibel 1:13

<sup>37</sup> Au taidei anafaiweya Deivida tauna ani Mesaiya givewagana 'yaku Kauveya', aku gavaiyamu-yo Mesaiya aimo gitubuga Deivida yana tubudelideli seyana?" Ada Yeisu yana vewala yoo lakaina moyaidi nuwadi givaina.

*Keke taudeyavo adayegana kana kilakaidi.*

*Mad 23:1-12; Luk 11:43, 20:45-47*

<sup>38</sup> Ada yana vewala-nai wagaine givonedi, "Wana itaveyabimi Mosese yana veimeya anatovewalayavo yadi dewa wagaine. Badi nuwanuwadi adinuya manamanawedi ina osedi aku ina nunudadana, ada nuwanuwadi kaliva wa yadi vemoimoina ina vesiuleyedi maketi wagaine.

<sup>39</sup> Kaduwe nuwanuwadi manuwa ebavewala wagaidiya ina vetovetoga fafali-dina kaikaiwabudi wagaidiya, ada kaduwe kanibutu lakaidi aditoveya ani nuwanuwadi ina vetovetoga ebavetoga-dina isedi kaliva wa adivemoimoina faidiya.

<sup>40</sup> Badiyavo tova ke tova kaliva matadiya ina veoveola-faila aku kaduwe sikwasikwa ifwayafwayadi e ada yadi manuwa ke yadi giba ina lemalemadi. Biyavo-dina taidei adimatavuloga vitana velemonoena ina nuwagana."

*Sikwa seyadi yadi velelavovo isena.*

*Luk 21:1-4*

<sup>41</sup> Ada Yeisu givetoga maita tabae velelavovo anaebavedodoga wagaine, aku kaliva yadi velelavovo iboibou ani gimatawabuwbuyedi. Kaikaiwabudiyavo moyaidi ielai yadi velelavovo mani lakaina iboibou.

<sup>42</sup> Ada kaduwe sikwa fanifanidi ielai ke yadi velelavovo mani kabisona iluwei idododi. Maninai vaita toya seyana anafaiweya.

<sup>43</sup> Ada Yeisu yana tonogalayavo gidouwedi ielai ke givonedi, “Vona velemonoena, sikwa taidei yadi velelavovo ani kaliva moyaidi yadi velelavovo gitubusegedi.”†

<sup>44</sup> Faina kaliva moyaidi ivele-kavovo ani yadi kaikaiwabu lakaina gimiyamiya aku anatufu kabisona isena. Aku badi fanifanidi ani maninai kabisona vaita gida lemedi ani matatabuna iseyabuna.”

## 13

*Manuwa tabu anaiyawela faina.*

*Mad 24:1-2; Luk 21:5-6*

<sup>1</sup> Yeisu manuwa tabu wagaine giyegeyegemona aku yana tonogala seyana givona, “Tovewala, una itadi. Kabala lakaidi ani adiita iwaka-vagaidi! Ada manuwa tabu anaiyogona iwaka-moena!”

<sup>2</sup> Aku Yeisu gilufata, “Manuwa taidei lakaidi uitadi, aku aimo keke seyana kabala-dina unaita-vagiledi yadi ebamiya wagaidiya. Matatabuna ina vetutuyaweyawelidi inaobu.”†

*Tova mulina anaiyaiyaya faidiya.*

*Mad 24:3-22; Luk 21:7-24*

<sup>3</sup> Aku Yeisu ginau Oya Olive gilaka givetogana, wada laubeu fafaline manuwa tabu wagaine-deya. Aku Pita, Iyemesa, Iyoni ke Andulu adiloigaga inau Yeisu wagaine ada itolidadanena,

---

† 12:43 2Kol 8:12    † 13:2 Luk 19:44

4 ivona, “Uda vonema, gaitoma-dina taidei uvonayedi ani gavatova wagaine ina yegemona? Ada gava iyaiyaya anaita ayo ana alamane anatova gina yegemona?”

5 Ada Yeisu givonedi, “Wana itaveyabimi ada keke seyana gaito yana vefwayafwaya wagaine gina sibalemi.

6 Faina aimo kaliva tufona moyaidi akuyeganya inaelai ina vonaga, ‘Iya game-nai tauku Mesaiya!’ Ada yadi fwaya-nai wagaine kaliva moyaidi ina vuyoyedi.

7 Kaduwe gaviya lakaidi butuna ina lavulavuga valeyadi wana nogalina lilivamiya ke atuwadeya. Aku keke wana aseuloulolo, faina gilubodana gaitoma-dina taidei ina yegemona. Aku ebalauyabu anato<sup>\*\*</sup> ani aimoina.

8 Faina yoo seyana ina mididi ke mali yoo nodi ina lugaviya, ada kadu anafaiweya ebaveimeya seyana gina alakaidi ke mali ebaveimeya nodi ina lugaviya. Ada fafali moyaina wagaidiya mabibi inamadu, kadu loka ina yegemona. Taidei gaitoma-dina ani tova mulolova anaebavevuvumowa. Au aimo tova vitana kadu ielaelai.

9 “Aku taumiyavo wana itaveyabimi, faina aimo kaliva ina kiveyabimi ke ina nauwemi ebavonayavuga wagaidiya ada kaduwe manuwa ebavewala wagaidiya ina lavulavumi. Ada imi yaku tonogalayavo faina, toveimeya lakaidiyavo ke

---

<sup>\*\*</sup> **13:7** Vona-nai ‘ebalauyabu’ ananuwanuwa taide maita-nai wagaine ani Buki Tabu anatoalamana tufodi inuwanuwa vaita ananuwanuwa ani ‘babi anaebalauyabu’, aku tufodi inuwanuwa vaita ananuwanuwa ani ‘manuwa tabu anaebalauyabu’.

kiniyavo matadiya wana mididi e ada valeya iwakana faikuya wana awatalatalaina badi wagaidiya.

<sup>10</sup> Aku gilubodana nagona Yaubada yana ebaveimeya anavaleya iwakana ina lumamalena babi anakaliva adiyoo moyaidi wagaidiya, ada muliya ebalauyabu gina yegemona.

<sup>11</sup> Aku tova-nai ina kiveyabimi ke ina vevonayavugimi, keke wana venuwana gavaiyamu wanavona faina. Au tayuwe tova-nai wagaine gavavona Aluwaluwa Tabuna gina alavelevelemi ani wana vonayena. Faina yami ifufu ani keke taumiyavo yami nuwenuweya gina yegemona aku Aluwaluwa Tabuna givonavona.

<sup>12</sup> “Ada kaliva seyana tauna anatubuluga ginavai toveimeyayavo nimadiya ginasena ke ina luvealikana, ada tama natudiyavo ina vaidi toveimeyayavo nimadiya inasedi ke ina luvealikadi. Kaduwe biyabiyama inadiyavo ke tamadiyavo ina venibainedi ada ina vaidi toveimeyayavo nimadiya inasedi ke ina luvealikadi.

<sup>13</sup> Ada kaliva moyaidi ina agougemi faina imi yaku tonogalayavo.† E aku badi gavega ina atuvefaila-vagata yadi vetumagana wagaine ke Yaubada ina labina analaba yawaidi anaebalauyabu wagaine, Banae gina kibababaledi.†

*Yeisu gaitoma-nai koyo-moena bwanebwane-  
nena Yaubada matane faina givonaye-vagina.  
Mad 24:15-22*

---

† 13:13 Iyo 15:18-21    † 13:13 Mad 10:17-22, Luk 12:11-12

14 “Aku aimo gaitoma koyo-moena bwaneb-wanenena Yaubada matane ani aimo wana itana gina midimididi manuwa tabu wagaine.† Ada tova-nai wagaine badi gavega Yudiya anafafali wagaine ina miyamiya ani gilubodadi inaota in-alaka oya wagaidiya. Ee, gavega vona taidei ina veyawana ani nuwadi gida malina.

15 Ada badi gavega yadi manuwa getane ani idaobu aku keke idaluku yadi manuweya ke seyana gavana idavai ida nauwe. Au ida maduota.†

16 Ada kai badi gavega yadi bakuleya ina miyamiya aga keke idayewa manuweya ke adinuya badobadona idavai. Au ida maduota.

17 Ada kaduwe ota anatova wagaine ani vevine waifugadiyavo ke vevine tovesusu ina venuwakalikali velemonoena, faina keke adifaiweya ina maduota.

18 E ada wana veoveola ke tova iwakana Yaubada gina velemini yami tova ota wagaine, aku keke tulutulu anatoveya.

19 Faina yadayada-dina wagaidiya ani vita lakai-moena gina yegemona. Tainei vita-nai ani keke seyana anafaiweya gida miyami tova-nai Yaubada givebutu gaitoma matatabuna gibubudi ada gielai malina. Kaduwe, keke aimo gina yegemona-vagila anafaiweya.†

20 Vita tainei ani kai Yaubada keke anatova gida kivemaufu, aga kaliva matatabuna idakwa. Aku Banae yana kaliva venuvenuwadadanidi, biyavo-dina Tauna faine givenuwadadanedi ani badi faidiya tayuwe tova-nai gina kivemaufona.

---

† 13:14 Dan 11:31    † 13:15 Luk 17:31    † 13:19 Dan 12:1, Ives 7:14

*Yeisu giifufu keliso fwayafwayadiyavo faidiya.*

*Mad 24:23-28; Luk 17:23-24*

<sup>21</sup> “Tayuwe tova-nai wagaine kai tamo gaito gina vonemi, ‘Wanaela wana itana, Mesaiya Tauna idauwe!’ o kai ginavona, ‘Wana itana, Banae tayuwe!’ aga keke yana vona-nai wana vetumagane.

<sup>22</sup> Faina keliso fwayafwaya ke falofita fwayafwaya aimo ina yegeyegemona ada iyaiyaya lakaidi ke gugai ebameyasidobodobo ina faifaisewadi, ke vaita meyameyaganina Yaubada yana kaliva venuvenuwadadanidiyavo ina vuyoyedi.

<sup>23</sup> E ada imiyavo ani wana itaveyabimi! Gaitoma taidei moyaidi faidiya gavonamatawe-vagaimi.”

*Banae Kaliva Natuna yana yewa-vagila faina.*

*Mad 24:29-35; Luk 21:25-33*

<sup>24</sup> Ada kaduwe Yeisu givona, “Aku tova vitana gina avaina, muline kauwana gina yuyuvana ada vaikoi yana malina ginaweu.†

<sup>25</sup> Ailabama mwatuguya inabeu, ada gaitoma toyogidi wagabameya gina aliuliudi.†

<sup>26</sup> Ada tayuwe tova-nai wagaine Banae Kaliva Natuna ina itana buibui wagaidiya gina elaelai wa yana toyogina lakaina ke wa yana iwakana mamalina nodi.†

<sup>27</sup> Ada tova-nai wagaine yana aneloseyavo gina imilidi inanau babi matatabuna wagaine ke yana yoo venuvenuwadadanidiyavo ina vagauwidi.† Fafali tulina tulina wabolimaneya

† 13:24 Ive 6:12 † 13:25 Ive 6:13 † 13:26 Mad 26:64, Ive 1:7

† 13:27 1Tes 4:16-17

wayavalaseya  
ina vagauwidi.

walaubeuya

waoyeya

*Ai alaa anaalamana.*

*Mad 24:32-35; Luk 21:29-33*

<sup>28</sup> “Wana itana ai alaa ada wana nuwenuwena. Kai alaa lukuna bademowa gina mavuna ada kabuna evaguna gina lukabukabu, tainei waga-gaine wana alamanena vaita bademowa ginagina lakaina yana tova givelilivana ke kauwana toyo-gina gina vebutu.

<sup>29</sup> E ada kaduwe anafaiweya, tova-nai wana itadi iyaiyaya-dina ina yegeyegemona, aga wana alamanena vaita Banae Kaliwa Natuna yana yewa-vagila anatova bademowa gilugavogavona.

<sup>30</sup> Gavonemi velemonoena, tova malinai anayooy-avo ani keke ina alika-yabu aku taidei gaitoma-dina matatabuna inamadu yegemona.

<sup>31</sup> Gabama ke babi gina avaidi aku yaku vona keke maita ginaavai, au ginamiya-vagata.

*Yeisu yana yewa-vagila anatova ani keke tamo gaito gida alamane.*

*Mad 24:36-44; Luk 21:34-38*

<sup>32</sup> “Aku yadayada-nai kai kauwana anabai ani keke seyana gaito gida alamane. Badi aneloseyavo gabameya keke ida alamane, kaduwe Banae Kaliwa Natuna Tauna keke gida alamane, aku Tamana anakai-be-mowa gialamanena.<sup>†</sup>

<sup>33</sup> E ada wana itaveyabimi ke wana veitabodaboda, faina yaku yewa-vagila anatova keke wada alamane.<sup>†</sup>

---

<sup>†</sup> 13:32 Mad 24:36    <sup>†</sup> 13:33 Mad 25:13

<sup>34</sup> Anafaiweya kaliva lakaina seyana ginanau mali fafaliya faina, yana togugaiyavo yadi gugai seyana seyana givedi, aku banae manuwa anawana anatoitaveyabina veimeya givelena ke gina itaita.†

<sup>35</sup> Tainei faina wana itaita, faina keke wada alamane toni manuwa yana tova yewa-vagila, kai lavilaviya, boginafeya, malalavulavugeya o kai malabutuya.

<sup>36</sup> Wana itaita aenanai gina yegemonimi ada gina nuwagami wana daudau.†

<sup>37</sup> Gavana gavonayena imi wagaimiya ani kadu kaliva moyaidi faidiya, gavona, 'Wana itaita.' "

## 14

*Tonagona lakaidiyavo iveimeya-kavu Yeisu ina luvealikana.*

*Mad 26:1-5; Luk 22:1-2; Iyo 11:45-54*

<sup>1</sup> Ada yadayada iluwei gina avari muline, kanibutu gina yegemona anayegana Nugulina ke Beledi Keke wa Anayisti Anakanibutu.\*\* Aku veyavo anatovegugai lakaidiyavo ke Mosese yana veimeya anatovewalayavo ani wai ilelelena ke Yeisu ina kiveyabina ada ina luvealikana,† aku ikavuya-deya,

---

† **13:34** Luk 12:36-38      † **13:36** Luk 12:37-38      \*\* **14:1**  
 Nugulina anakanibutu givevuvu yadayada ebavevuvu wagaine aku Beledi Keke wa Anakiveinala Anakanibutu ani givevuvu yadayada anavelu ke ginau yadayada seveni. Kanibutu-dina moyaidi ivewagadi 'Nugulina', vaita kanibutu seyana, aku velemono iluwei. (Iyeg 12:1-27)      † **14:1** Mak 10:33-34

<sup>2</sup> faina ivona, “Keke Abutu anatova wagaine kana kiveyabi, faina kaliva ina nuwakoyoyeda ke gaviya ina silakaina.”

*Vavine seyana Yeisu gibunamina Bedani wagaine.*

*Mad 26:6-13; Iyo 12:1-8*

<sup>3</sup> Ada Yeisu ginau Bedani melala wagaine gimiyamiya Saimoni yana manuweya. Banae tuwaina givelifelo aku giveiwaka, e aku aimo ivewagana Saimoni tolefelo. Ada ienokekela ikanikani ani vavine seyana bunama anayegana ‘nadi’ gialiyena, magana iwaka-moena kadu fatana lakaina. Bunama-nai tuwava kabala anayegana alabasita negenine gimiyamiya. Ada vavine-nai anatuwava odona giludobona ada Yeisu kuluwane giwana.

<sup>4</sup> Aku kaliva tufodi iitana ada inuwakoyo vavine wagaine ke taudiyavo gaga ivonavona, “Gavana faina bunama givenuwaegege?”

<sup>5</sup> Kada vekimoneyena, e ada anafaiweya kaliva fatana malamala seyana wagaine kada nuwagana ke tofanifani kada veledi.” Ada vavine iduweyena toyogina.

<sup>6</sup> Aku Yeisu givona, “Wanase-moe ginamiya. Gavaiyamu-yo vita wavele vavine-nai? Gavana gigana wagaikuya ani iwakana velemona.

<sup>7</sup> Fanifani ani tova moyaina wagaimiya imiyamiya ada kai gavatova wagaine nuwanuwami wana lemedi, aga amifaiweya yami nuwakabubu wana veledi. Aku Iyayeku ani aimo keke tova moyaina nodi kana miyami.

<sup>8</sup> Banae ani gavana anafaiweya, taine gigugaiyena. Vovoku gimadu bunamina akuibo didikuleya faina.

<sup>9</sup> Gavonemi velemonoena, gadedeku babi matatabuna wagaine valeya iwakana ina lumamalena, vavine taidei yana gugai iwaka-vagaina wagaikuya ina ifufuyena anaebanuwaududu faina.”

*Yudasa giawaegau ke Yeisu gina atuegena ni-bainavo nimadiya.*

*Mad 26:14-16; Luk 22:1-6*

<sup>10</sup> E ayo Yudasa Isakaliyota, banae adituwelo seyana, ginau veyavo anatovegugai lakaidiyavo wagaidiya ke Yeisu gina ivemogatalina wagaidiya faina.

<sup>11</sup> Badi Yudasa yana vona inogalina wagaine ivemwamwala lakaina, ada ivonadabadaba bana wagaine vaita mani ina vena. E ada Yudasa givebutu wai gilele ke gavatova iwakana wagaine Yeisu gina atuegena wagaidiya.

*Yeisu yana tonogalayavo nodi Nugulina Aana ikani.*

*Mad 26:17-25; Luk 22:7-13*

<sup>12</sup> Abutu-nai anayegana Beledi Keke wa Anayisti anayadayada nagona giyegemo.<sup>†</sup> Yadadayada-nai wagaine meIsileli tova moyaina Nugulina analami ivevebolavoiyedi. E ada Yeisu yana tonogalayavo ielai wagaine ke itolidadana, ivona, “Gadedeku nuwanuwa anana ke aa ana kidewadewa Nugulina anakani faina?”

---

<sup>†</sup> **14:12** Iyeg 12:14-20

<sup>13</sup> Ada Yeisu yana tonogalayavo adiselu giim-ilidi aku givonedi, “Wananau Yelusalema ada kaliva seyana gufa wa tuwavina giavalana, ani nodi wana venuwaga. Banae wana muliyena,

<sup>14</sup> ada gavamanuwa wagaine ginaluku aga toni manuwa wana vonena, ‘Tovewala givona, Gad-edeku wakawaka yadi tutulagolota ada wagaine yaku tonogalayavo nodi Nugulina aana anakani?’

<sup>15</sup> Ada banae gina vewalemi tutulagolota lakaina manuwa getane, bademowa giba matatabuna isedewedewena. Wadedeku-deya adaga wana kidewadewa.”

<sup>16</sup> Ada tonogalayavo adiselu itauya inau melala lakaina wagaine, ada gavana Yeisu givonayedi ani inuwagana anafaiweya. E ada wadedeku Nugulina aana ikidewedewena.

<sup>17</sup> Mala gibogi Yeisu gielai yana tonogalayavo adituwelo nodi.

<sup>18</sup> Ada teibeli liliwane ienokekela ikanikani aku Yeisu givona, “Vona velemoena, gavona wagaimiya, kaliva seyana wagaimiya gina ivemogataliku nibaikuweyavo wagaidiya, banae Iya nodi akanikani.” †

<sup>19</sup> Ada nuwadi givita ke seyana seyana ivona Yeisu wagaine, “Kai Iyayeku?”

<sup>20</sup> Ada gilufata wagaidiya, givona, “Banae amituwelo wagaimiya, banae-nai Iya nodi beledi autuvina nauwa wagaine.

<sup>21</sup> Velemoena Banae Kaliva Natuna gina alika Yaubada yana vona vetovetokilumina givonayena anafaiweya, aku kaliva-nai gina ivemogatalina nibainavo wagaidiya ani

---

† 14:18 Sam 41:9

aimo vita lakai-moena gina nuwagana! Kai keke gida tubuga, ina iwaka-moena.”

*Yeisu sakalameni anagiduwa giseyegemonena.  
Mad 26:26-30; Luk 22:14-20; 1Kol 11:23-25*

<sup>22</sup> Ada ikanikani aku beledi givaina, Yaubada wagaine givona vesiule, ada gikiinena ke tonogalayavo giveledi aku givona, “Wana vaina. Taidei vovoku.”

<sup>23</sup> Ada kaduwe waini wa veina givaina ke givona vesiule Yaubada wagaine, ada giveledi matatabudi wagaine iyuga.

<sup>24</sup> Ada kaduwe givonedi, “Taidei ani dayagiku Yaubada yana veyavo anawai faina. Gimadumadu tomiyababi moyaidi faidiya.†

<sup>25</sup> Gavonemi velemonoena, keke kaduwe waini ganayu-vagile analaba yadayada-nai wagaine Yaubada yana ebaveimeya wagaine waini evaguna ganayuna.”

<sup>26</sup> Ada kweli davadava ikweliyena. Ada ikweli giavaina, ina ilaka Oya Olive wagaine.

*Yeisu givonaye-vagina Pita yana vewa faina.  
Mad 26:31-35; Luk 22:31-34; Iyo 13:36-38*

<sup>27</sup> Ada Yeisu givonedi, givona, “Imi moyaimi yami vetumagana wagaikuya gina kabekabebena ke wanaota-yabuyabuku. Faina Yaubada yana vona seyana ivetokilumina givona,

‘Sifi aditoitaveyabina gana mununa  
ada sifi wauma ina awalanau.’ †

---

† 14:24 Iyo 6:54-58, 1Kol 10:16    † 14:27 Sek 13:7

<sup>28</sup> Aku ganayawa-vagila muline, wai gana nagona Galili, ada wadedeku-deya imi wanaela gana itami.”

<sup>29</sup> Ada Pita gilufata, givonaga, “Kai badi moyaidi inaota-yabuyabuni aku Iya au keke-mowa!”

<sup>30</sup> Ada Yeisu givona Pita wagaine, “Gavoneni velemoena, bogibogi taidei kamukamu keke gina kwage tova iluwei aku nagona unamadu veweyeku tova toiye vaita keke uda alamaneku.”

<sup>31</sup> Ada Pita giawafatafata toyogina, givonaga, “Kai O ina luvealikani aga Iya nodi ina luvealikada. Keke-mowa gana veweyeni!” Ada tonogalayavo moyaidi ivona anafaiweya.

*Yeisu giveoveola Gedesemani wagaine.*

*Mad 26:36-46; Luk 22:39-46*

<sup>32</sup> Ada Yeisu yana tonogalayavo nodi inau fafali seyana anayegana Gedesemani wagaine ada givonedi, givona, “Idedeku wana vetoga aku ganana gana veoveola.”

<sup>33</sup> Ada Pita, Iyemesa, ke Iyoni givaidi nodi inau. Aku Yeisu givebutu giaseuloulolo lakaina

<sup>34</sup> ada givonedi, givona, “Nuwaku givita lakaina, vaita yawaiku gida alagoloi. Idedeku wana miyamiya aku wana itaita.”

<sup>35</sup> Aku ginau maita-moena ada wamagigine givetalatala babi wagaine ke giveola Tamana wagaine vaita uloulolo anatova gida vaiyavulena.

<sup>36</sup> Givona, “Kamaku, Kamaku-yo, O wagainiya gaitoma matatabuna meyameyaganina. Uloulolo anavei taidei uda vaiyegena wagaikuya. Aku

keke yaku nuwanuwa, au Oyeni ya nuwanuwa anafaiweya una gugaiyena.”†

<sup>37</sup> Ada Yeisu giyewana giitadi aditoto idaudau, ada Pita wagaine givona, “Saimoni, udaudau. Gavaiyamu, keke afaiweya kauwana anabai seya-moena una atuvefaila ke una itaita?

<sup>38</sup> Imi wana itaita ke wana veoveola e ada keke aladibidibi wagaine wanabe. Aluwaluwami nuwanuwana aku vovomi gikabekabebena.”

<sup>39</sup> Kaduwe ginau giveoveola-vagila, ada vonadina giinana-vagiledi.

<sup>40</sup> Giveoveola giavaina, kaduwe giyewana ani giitadi idaudau, faina badi matadi gikoyo-mowa. Ada gilivagudi aku keke ida alamane gavana inavona Bana wagaine.

<sup>41</sup> Ada au gisegedi aku kaduwe gina giveoveola, ada kaduwe tova anaveto giyewa-vagilena ke givona wagaidiya, givona, “Gavaiyamu, aimo wadaudau ada waveyaveyawai? Auwe! Bademowa tova giyegemona ke Banae Kaliva Natuna ina atuegena tokoyona nimadiya.

<sup>42</sup> Wana mididi kananau. Waitana, kaliva-nai ginaseku nibaikuweyavo nimadiya ani giyege-mona bademowa!”

*Yudasa Isakaliyota Yeisu giatuegena nibainavo nimadiya.*

*Mad 26:47-56; Luk 22:47-53; Iyo 18:1-11*

<sup>43</sup> Ada Yeisu aimo giifuifufu ani Yudasa giyege-mona, banae tonogala seyana adituwelo wagaidiya. Ada kaduwe yoo lakaina nodi ielai ani wa yadi benisi ke fetu, badi kaliva-dina ani

---

† 14:36 Iyo 6:38

veyavo anatovegugai lakaidiyavo ke veimeya anatovewalayavo ada kaliva lakaidiyavo yoo-dina iimilidi ielai.

<sup>44</sup> Aku Yudasa bademowa yoo iyaiyaya seyana gimaduveledi, givona, “Banae gaito gana veyaugina ani kaliva-nai. Wana kiveyabina ada wana nauwena ke wana itaveyabi-dewedewena e ada keke meyameyaganina ginaota.”

<sup>45</sup> E ada gielai tunutunugina ginau Yeisu wagaine ada givona, “Labai!” Ada giveyaugina.

<sup>46</sup> Ada Yeisu ikiveyabina.

<sup>47</sup> Aku kaliva seyana lilivadiya gimidimididi ani yana benisi gisiwakana ada kaliva seyana tagana gitalayoe gibeu. Bana kaliva-nai ani veyavo anatovegugai aditonagona yana togugai seyana.

<sup>48</sup> Ada Yeisu givona wagaidiya, givona, “Gavaiyamu, Iya vaita tobaninivula anafaiweya e ada waelai wabenisimiyavo ke wafetomiyavo ada wana kiveyabiku?

<sup>49</sup> Yadayada seyana seyana Iya imi nodi manuwa tabu wagaine gavevewala aku keke wada kiveyabiku.<sup>†</sup> Aku gavana Buki Tabu wagaine ivetokilumina ani analauboda gina yegemona velemono.”

<sup>50</sup> Taidei anafaiweya givona ada tonogalayavo moyaidi iota-yabuyabuna.<sup>†</sup>

<sup>51</sup> Aku tubulakata seyana Yeisu gimulimuliyena, ananuya kwayakwayana seymoena gisiwalina. Ada kaliva tufodi ikiveifana,

---

<sup>†</sup> **14:49** Luk 19:47, 21:37, Iyo 18:20    <sup>†</sup> **14:50** Mad 26:31, Iyo 16:32

<sup>52</sup> ada ananuya gimaduyabuyabuna aku wakonekonena giota.

*Yeisu inauwena meIsileli yadi Kaniselayavo wagaidiya.*

*Mad 26:57-68; Luk 22:66-71; Iyo 18:19-24*

<sup>53</sup> Aku Yeisu inauwena veyavo anatovegugaiyavo aditonagona yana manuweya. Ada veyavo anatovegugai lakaidiyavo ke kaliva lakaidiyavo ada veimeya anatovewalayavo ivagauta manuwa-nai wagaine.

<sup>54</sup> Aku Pita bana atuwadeya Yeisu gimuliye gielai veyavo anatovegugai aditonagona yana manuwa anaebaga wagaine giluku. Ada gina givetoga manuwa tabu anafilisimaniyavo nodi ke ai givevevala.

<sup>55</sup> Aku veyavo anatovegugai lakaidiyavo ke meIsileli yadi Kanisela moyaidi† toveloi ileledi e ada wagaidiya vaita Yeisu ina veloina, ada yadi fwaya-nai wagaine vaita adifaiweya alika wagaine inasena. Aku keke ida nuwaga.

<sup>56</sup> Toveloi moyaidi ilakaela iveloina, aku keke kaliva iluwei ida veaigaigabu yadi vona wagaidiya.

<sup>57</sup> E aku kaliva tufodi imidiyegemona ke vona fwaya ivonayena Yeisu faine, ivona,

<sup>58</sup> “Ime anogalina ani givonaga, ‘Manuwa tabu taidei kaliva nimadiya iyogona ani gana yawelina, ada yadayada toiye wagaine kadu seyana gana yogona.† Ada manuwa tabu-nai taidei

---

† 14:55 Luk 23:50 ke anaailabama adikivemala    † 14:58 Iyo 2:19-21

ani keke gina mididi babi taidei anakalivayavo nimadiya.’”

<sup>59</sup> Aku kaduwe badiyavo yadi awatalatalaina keke ida veaigaigabu.

<sup>60</sup> Ada banae veyavo anatovegugai aditonagona moyaidi nefanidiya gimidiyegemona aku Yeisu gitolidadanena, givona, “Gavaiyamu, keke afaiweya una lufata? Gavana faina kaliva taidei yadi awavekoyo fainiya keke udafata?”

<sup>61</sup> Aku Yeisu keke tamo laufata gida vonaye, au giveyamata-mowa.<sup>†</sup> Ada kaduwe bana veyavo anatovegugai aditonagona gitolidadanevagilena, givona, “Gavaiyamu, vona velemonoena Oyeni Mesaiya, Banae kadavadavana Natuna?”

<sup>62</sup> Ada Yeisu givona, “IYA TAUKU GAMIYAMIYA.”\*\* Ada aimo wana itana Banae Kaliva Natuna ani Yaubada Totoyogi-vagaina aiyatagine gina vetoga gina miyamiya, ada gabama anabuibui tabodiya gina elaelai.”<sup>†</sup>

<sup>63</sup> Yeisu taidei anafaiweya givona ada veyavo anatovegugai aditonagona-nai ginuwakoyo lakaina ke tauna ananuya gikelilina aku givona, “Aaa! Gavana faina toitedama kaduwe aimo kana lelele?”

<sup>64</sup> Bademowa yana vona awadamana wanogalina. Gavaiyamu wana veimeya?”

---

<sup>†</sup> **14:61** Ais 53:7, Mak 15:5      \*\* **14:62** Buki-nai Iyegemona 3:13-14 wagaine Mosese Yaubada gitolidadanena gavaiyamu anayegana meIsileli wagaidiya gida inanana, ada Yaubada givonena, “MeIsileli una vonediga, ‘Banae anayegana IYA TAUKU GAMIYAMIYA ani giimiliku wagaimiya.’” Ada kaduwe Iyoni 8:24,28,58, ada 13:19 wagaidiya Yeisu yegana-nai giinanana Tauna faine.    <sup>†</sup> **14:62** Mak 13:26

Ada moyaidi iawavekoyoyena ke iveimeya, yana vona awadamana faina analauboda gina alika.†

<sup>65</sup> Ada tufodi ivebutu Yeisu ikiwalina aku magigina ikiwafina ada itafivilavilana aku ivon-avonaga, “Una falofisai!” Ada manuwa tabu anafil-isimaniyavo ivaina ke ilavulavuna.†

*Pita Yeisu gialamanena aku giveweyena.*

*Mad 26:69-75; Luk 22:54-62; Iyo 18:15-18,25-27*

<sup>66</sup> Aku Pita gimiyamiya dibune ebaga-nai wagaine aku veyavo anatovegugai aditonagona yana togugai vavine seyana gielai.

<sup>67</sup> Ada giitana Pita ai givevevala ani giitadonedonena ke givona, “Oyeni kaduwe Yeisu kwana Nasaledi nodi.”

<sup>68</sup> Aku givewa, givona, “Iya keke gada alamane ada keke nuwaku gidamali gavana uvonevone!”

<sup>69</sup> E, ada ginau tabae wana wagaine ada kamukamu gikwage. Ada vavine-nai wadedeku gitana ke givona-vagila tomididi wagaidiya, givonaga, “Tayuwe kaliva-nai ani Yeisu yana kaliva seyana.”

<sup>70</sup> Aku kaduwe givewa.

Ada tova kabisona tomididi-dina lilivane ivona Pita wagaine, ivona, “Velemoena, oyeni yana yoo seyana, faina oyeni kwana Galili.”

<sup>71</sup> Aku Pita givona, “Kai keke ganavona velemoena, aga gilubodana Yaubada gina vemataavulogiku. Aku ganavona velemoena, Bana Kaliva-nai wavonayena ani keke gada alamane!”

---

† 14:64 Vei 24:16 † 14:65 Ais 53:5

<sup>72</sup> Ada maduga-mowa kamukamu gikwage anavelu ke Pita giduna vona-nai Yeisu givonayena wagaine, givona, “Muliya-yo kamukamu gina kwage tova iluwei aku nagona unavewa tova toiye vaita keke uda alamaneku.” † Ada Pita yana vewa-nai nuwana giafolena, au gitagilumaibulu.

## 15

*Yeisu givonayavuga Pailato wagaine.*

*Mad 27:1-2,11-14; Luk 23:1-5; Iyo 18:28-38*

<sup>1</sup> Mala gilavuna malabutuya-mwaeya, maduga-mowa badi veyavo anatovegugai lakaidiyavo ada kaliva lakaidiyavo ke veimeya anatovewalayavo ada kaduwe meIsileli yadi Kanisela, moyaidi ivagauta ke nodi iveimeya gavana inagai. Ada Yeisu nimana iyogodi ke inauwe iatuegena Pailato wagaine.\*\*

<sup>2</sup> Ada Pailato gitolidadanena, givonaga, “Gavaiyamu, Oyeni meIsileli yadi Kini?”

Ada Yeisu gilufata ke givona, “Au uvona anafaiweya.”

<sup>3</sup> Ada veyavo anatovegugai lakaidiyavo Yeisu iawavekoyoyena gaitoma moyaidi wagaidiya.

<sup>4</sup> Ada kaduwe Pailato Yeisu gitolidadanevagilena, “Gavaiyamu, keke maita ya laufata?”

---

† 14:72 Mak 14:30      \*\* 15:1 Pailato ani banae kwana Loma, ada meLoma ivenuwadadanena banae meIsileli aditoveimeya lakaina. Ada Loma anakabemali yadi veimeya seyana ani taudiyavo adifaiweya kaliva yana koyona anamatavuloga faina ina luvealikana, aku meIsileli iawatadi e ada keke adiawaega ke kaliva yana koyona anamatavuloga faina ina luvealika. Taidei faina meIsileli Yeisu ialiyena Pailato wagaine. (Iyo 18:31)

Uitana, yadi awavekoyo wagainiya ani moyaimoena.”

<sup>5</sup> Aku kaduwe Yeisu keke tamo laufata gida vonaye.† E ada Pailato meyana gisidobona.

<sup>6</sup> Aku Nugulina Abutuna anatova seyana seyana wagaidiya, Pailato yana dewa ani kaliva yogoyogona seyana deli wagaine gina etoyavuna, banae-nai faine yoo ina veolena.

<sup>7</sup> Ada tayuwe tova-nai wagaine kaliva seyana yogoyogona gimiyamiya anayegana Balabasi, ani kabemali nibaidiyavo nodi deli wagaine imiyamiya, faina badiyavo veimeya iawaegegena ada nodi ilugaviya ke kaliva tufodi iluvealikadi.

<sup>8</sup> Ada tova-nai yoo lakaina ivagauta ada iveola Pailato wagaine anafaiweya yana gugai malamala seyana seyana.

<sup>9</sup> Ada Pailato gitolidadanedi, givona, “Gavaiyamu, nuwanuwami Banae meIsileli yami Kini gana etoyavuna faimiya?”

<sup>10</sup> Faina gialamanena velemono veyavo anatovegugai lakaidiyavo nuwanuwadi lakaina kaliva badi ina vemoimoinedi, aku iitanuwagana moyaidi ani Yeisu ivemoimoinena ke imulimuliyena, e ada agodi giuga Banae wagaine. Ada taide vuvuna-nai faine Yeisu ikiveyabi inauwena ada iatuegena Pailato wagaine.†

<sup>11</sup> Aku veyavo anatovegugai lakaidiyavo yoo-dina iivenuwuwadi toyogina ke Pailato ina veolena vaita Yeisu ginamiya aku Balabasi gina etoyavuna. E ada taidei anafaiweya Pailato ivonena.

---

† 15:5 Ais 53:7    † 15:10 Iyo 11:47-48, 12:19

12 Ada Pailato kaduwe yoo gitolidadane-vagiledi, givona, “Gavana ganagai kaliva-nai wagaine banae wavewagana ‘MeIsileli yadi Kini?’”

13 Aku yoo ivedou, ivonaga, “Una kivebolagalagana!”

14 Ada Pailato givona, “Gavana faina? Gavakoyona gigai?”

Aku badi bonadi kaduwe gilaka-mowa, ivedoudou ivona, “Una kivebolagalagana!” †

15 Ada Pailato nuwanuwana yoo gina kivemwamwalidi faina, Balabasi gietoyavuna faidiya. Ada Pailato giveimeya ke tolugaviya Yeisu ilubibiwalina, ada nimadiya gisena ke ina kivebolagalagana.†

*Tolugaviya Yeisu iawaveleigena.*

*Mad 27:27-31; Iyo 19:1-3*

16 Ada Pailato yana tolugaviyayavo Yeisu ikiveyabina ada inauwena veimeya anamanuwa lakaina anaebageya, ada tolugaviya adiyoooyavo idouwevagauwidi.

17 Ada nuya yabeyabelina luveyalilina wagaine Yeisu iveosena, ke bulava akakaluluna imetana ani kedukedu kaikaiwabuna anafaiweya ada kuluwane isena.\*\*

18 Ada ivevuvu ke awaveleigeya iludakedakeyena, ivona, “Siule! Oyeni meIsileli yadi Kini!”

† 15:14 Gug 3:14 † 15:15 Mad 27:26, Luk 23:16, Iyo 19:1

\*\* 15:17 Tova tuwaina nuya yabeyabelina ani kini adiveigavu. E ada nuya seyana anafaiweya ani tolugaviya iveosena Yeisu wagaine, faina ina awaveleigena.

19 Ada aiwala ivai kuluwana ilavulavuna, ada ikiwalitagotagona aku awaveleigeya tugadi ivetodonedo ke ioduodu wagaine.†

20 Iawaveleigena giavaina, nuya yabeyabelina iveyalilina aku tauna ananuya iveosena ada iyegemone inauwena ke ina kivebolagalagana.

*Yeisu ikivebolagalagana.*

*Mad 27:32-44; Luk 23:26-43; Iyo 19:17-24*

21 Ada itauya Yeisu inaunauwena aku kaliva seyana kwana Sailini inudebaina, anayegana Saimoni. Yana fafaliya gitauya ke Yelusalema wagaine gielaelai. Banae Alekisanida ke Lufuso tamadi. Ada tolugaviya iluyayalina ke Yeisu anakelose gina avalana.

22 Ada Yeisu inauwena fafali-nai ivewagana Goligota wagaine. Tainei 'Goligota' anakivila ani 'Kuluwa Sewakelu Anafafali'.

23 Ada waini ke mulamula nodi ivila ivelena, aku keke gidayui.

24 Ada ikivebolagalagana. Aku ananuya ivai ivutugedi taudiyavo gaga wagaidiya, taine kabala anaselakalakata anavenuwadadana wagaine.†

25 Wada malabutuya kauwana naeni kiloki wagaine Yeisu ikivebolagalagana.

26 Aku anaawavekoyo ivetokilumina anakelose wagaine ani givona,

“MeISILELI YADI KINI.”

---

† 15:19 Luk 23:11    † 15:24 Sam 22:18, Iyo 19:24 ke anaailabama adiebakivemala

27-28 Ada kaduwe tobaninivula adiselu Yeisu nodi ikivebolagalagadi adikelose wagaine, seyana aiy-atagine, kadu seyana aimauline.†

29 Ada kaliva wai wagaine inaunau ani Yeisu ivona awadamanena, ivona, “O uvona evona manuwa tabu uda yawelina aku yadayada toiye wagaine kadu udayogo-vagilena. Nikayo!

30 Tauni una kibababalení ada una etoyavuni kelose wagaine unaobu!” †

31 Ada kadu anafaiweya veyavo anatovegugai lakaidiyavo ke veimeya anatovewalayavo ani Yeisu iawaveleigena, ivona, “Mali kaliva gikibababaledi, aku keke anafata Tauna gina kibababale!

32 Evona, Banae Mesaiya kadu Isileli anakini, malinai-mowa kelose wagaine gidaobu, e ada kanaita kana vetumagana!” Ada adiselu nodi ikivebolagalagadi ani badi kaduwe iawavekoyoyena.

*Yeisu yana alika faina.*

*Mad 27:45-56; Luk 23:44-49; Iyo 19:28-30*

33 Ada bademowa kauwana gielai anafaiweya givugivudeya ani yuyuvana babi matatabuna giyuyuvanibodena, ada gimiya analaba kauwana au gienovilana teli kiloki wagaine.

34 Ada tova-nai wagaine Yeisu givedou bonana lakaina, givona, “Eloi, Eloi, lama sabakitani?” Vona taidei anakivila, “O yaku Yaubada, yaku Yaubada, gavana faina unuyabuyabuku?” †

35 Ada kaliva tufodi wadedeku-deya imidimididi ani bonana inogalina ke ivona,

† 15:27-28 Ais 53:12 † 15:30 Sam 22:7, Mak 14:58, Iyo 2:19

† 15:34 Sam 22:1

“Wana nogalina! Wada Ilaitiya gidoudouwena, bana Yaubada yana falofita.”

<sup>36</sup> Ada wagaidiya-deya kaliva seyana gimadu ginau balou giutuvina waini gikoyo wagaine, ada aiwala bwatane give etoonana ke gitune lakavena Yeisu awane gisena vaita ginayuna, ada givona, “Kanaboda aku kana itana. Kai Ilaitiya ginaela gina kakili gina seobuyena o kai keke.”

<sup>37</sup> Ada Yeisu givedou moiyalina ke yawaina giavaina.

<sup>38</sup> Ada manuwa tabu anaTutulagolota Tabutabu-moena ani anawana anaebaseboda kaleko† giagigi-lugena, tabone ada giobu dibune.†

<sup>39</sup> Aku tolugaviya aditonagona gimidimididi Yeisu wamagigine, ani giitana yana alika anaita anafaiweya ada givona, “Vona velemoena, taidei Banae Yaubada Natuna!”

<sup>40</sup> Aku kadu vevine tufodi badi Yeisu yana tonogalayavo, ani imididi maita tabae kelose wagaine aku imatawabuwabu. Badi wagaidiya-deya Meli vine Magidala, ada Meli Iyosefa taina Iyemesa nodi inadi, ke Salome.†

<sup>41</sup> Biyavo-dina tuwaina Galili wagaine Yeisu imuliyena ke tova moyaina ilemelemena. Ada kadu vevine tufodi Yeisu nodi ielai Yelusalema ani iitaita.

*Yeisu vovona isena didikula luwa wagaine.*

*Mad 27:57-61; Luk 23:50-56; Iyo 19:38-42*

<sup>42</sup> Yadayada-nai ani Tova Kidewadewa, faina malabutu Sabate. Ada bademowa mala givelav-ilavi ani

---

† 15:38 Iyeg 26:31-33 † 15:38 Ibel 10:19-20 † 15:40 Luk 8:2-3

<sup>43</sup> Iyosefa kwana Alimatiya giyegemona. Banae meIsileli yadi Kanisela anayoo seyana, ada kaliva moyaidi matadiya banae ani wa anavemoimoina ada wa anavetumagana. Aku kaduwe, gibodaboda gavatova Yaubada yana ebaveimeya gina lakayegemona. Banae kaliva-nai wa yana asevatu ginau Pailato wagaine Yeisu vovona faina giveolena ke gina kiwafina.

<sup>44</sup> Ada Pailato gitataweyana faina ginogalina vaita Yeisu bademowa gialika, e ada tolugaviya aditonagona gidouwe gielai ada gitolidadanena, “Velemoena Yeisu bademowa gialika?”

<sup>45</sup> Ada tova-nai Pailato yana alamana givaina tolugaviya aditonagona wagaine, Yeisu vovona giawaegena Iyosefa wagaine.

<sup>46</sup> Ada Iyosefa gina toalika analifi kwayakwaya-moena gikimone ginauwena, ada Yeisu vovona gikakilina kelose wagaine ke nuya-nai wagaine gifaina. Ada vovona ginauwena ke gilukuwena didikula wagaine. Didikula-nai ani luwa lakaina italafolela yavola maufona anakabala wagaine. Ada kabala lakaina givekaliwawana ke didikula awana gisebodana.

<sup>47</sup> Ada Meli vine Magidala ke Meli Iyosefa inana iitana gadedeku Yeisu vovona gisena.

## 16

*Yeisu alikeya giyawa-vagila.*

*Mad 28:1-10; Luk 24:1-12; Iyo 20:1-10*

<sup>1</sup> Ada Sabate bademowa giavaina, Meli vine Magidala ke Meli Iyemesa inana ada Salome, ani

badiyavo bunama iwakana ikimonena ke inanau Yeisu vovona ina bunamina.

<sup>2</sup> Ada Sanidei\*\* kauwana gikedufolega vevine-dina aditoto inau Yeisu anadidikula wagaine.

<sup>3</sup> Ada inaunau aku taudiyavo ivonavona, “Ide kanaunau, aku gaito kabala lakaina gina vekaliwawa didikula awane faideya?”

<sup>4</sup> Faina kabala-nai ani lakaina. Aku inuyege-mona didikula luwa wagaine ada iitanau, ani iitana seyana gaito bademowa kabala lakaina givekaliwawana didikula awane ada gisena afaine.

<sup>5</sup> Ada iluku didikula negenine aku iitana aiyatagidiya waina ani tubulakata seyana ananuya luveyalilina ke kwayakwayana givetovetoga. Ada vevine-dina iasekolukolu

<sup>6</sup> aku kaliva-nai givoned, givona, “Keke wana asekolukolu. Yeisu kwana Nasaledi walelelena, Banae ikivebolagalagana. Aku Yaubada bademowa gisiveyawa-vagilena alikeya! Banae keke idedeku. Wana itana fafalinai wagaine isena.

<sup>7</sup> Aku wananaunau yana tonogalayavo ada Pita nodi wana vonedi, ‘Yeisu wai ginagonagona Galili wagaine. Wadedeku-deya wana itana boi gimatawemi anafaiweya.’ ” †

<sup>8</sup> Ada vevine-dina ani meyadi gisidobodobomoena ke vetatava gikimunumunudi, ada

---

\*\* 16:2 MeIsileli wagaidiya Sabate givebutu Falaidei sikisi kiloki lavilavi, ada ginau Satadei sikisi kiloki lavilavi. Yeisu gialika kelose wagaine Falaidei teli kiloki lavilavi, ada giyawa-vagila Sanidei malabutuya. Taidei faina Sanidei ivewagana Kauveya anayadayada. (Mad 28:1, Luk 24:1, Iyo 20:1) † 16:7 Mad 26:32, Mak 14:28

didikuleya-deya iyegemona ada iota inau.  
Ada imadumadu aku keke tamo gaito  
ida awatalatalaine, faina imatauta.

*Yeisu giyegemona Meli vine Magidala wagaine.  
Mad 28:9-10; Iyo 20:11-18*

<sup>9</sup> Aku tova-nai wiki-nai anayadayada nagona  
wagaine malabutuya-mwaeya Yeisu giyawa-  
vagila, ada gimaduyegemona Meli vine  
Magidala wagaine, bane wagaine-deya tuwaina  
aluwaluwa bwanebwanenedi adiyoo seveni  
Yeisu giveyegemonidi.<sup>†</sup>

<sup>10</sup> Meli-nai ginau ke badi boi Yeisu nodi  
imiyamiya ani gimatawedi. Badi wa yadi  
nuwavita itagitagiya aku gimatawedi, givona,  
“Yeisu wayawaina gimiyamiya! Iya tauku  
gaitana!”

<sup>11</sup> Aku yana vona keke ida vetumagane.

*Yeisu giyegemona tonogalayavo adiselu wa-  
gaidiya.*

*Luk 24:13-35*

<sup>12</sup> Ada muliya Yeisu yana tonogalayavo adiselu  
Yelusalema-deya iyegemona ada inaunau seyana  
melala wagaine, ani waiya-deya Yeisu giyege-  
mona wagaidiya aku Tauna anaita gisevedav-  
edamana wagaidiya.

<sup>13</sup> Ada iyewa Yelusalema ke yana tonogala vel-  
ugadiyavo imatawedi, aku badi yadi vona keke  
ida vetumagane.

*Yeisu yana tonogalayavo adiveimeya giveledi.*

*Mad 28:16-20; Luk 24:36-49; Iyo 20:19-23; Gug  
1:6-8*

---

<sup>†</sup> 16:9 Luk 8:2

<sup>14</sup> Muliya badi afositoloyavo ileveni teibeli lili-vane ienokekela ikanikani, aku Yeisu giyege-mona wagaidiya. Ada giduweyedi yadi vetu-magana keke faina kadu badi debaidi gitoyoga faina. Faina Yaubada Banae Yeisu gisiveyawa-vagilena alikaya ada kaliva tufodi Bana iitana ke iifufufuyena wagaidiya, aku yadi awatalatalaina ani afositoloyavo keke ida vetumagane.

<sup>15</sup> Ada gimatawedi, givona, “Wananau babi matatabuna wagaine ada valeya iwakana wana lumamalena kaliva matatabudi wagaidiya.†

<sup>16</sup> Badi gavega ina vetumaganeku ada ina babitaiso ani kibababala ina nuwagana. Aku gavega keke ida vetumagana, badi Yaubada matane ani wa yadi koyona e ada adilauboda matavuloga ina nuwagana.†

<sup>17</sup> Ada badi ivetumaganeku ani Yaubada yana toyogina anaiyaiyaya ina seyegemonedi taidei anafaiweya. Akuyeganeya aluwaluwa koyodi kaliva wagaidiya ina veyegemonidi, ada meya tulina tulina wagaidiya ina ifuifufu.

<sup>18</sup> Ada kai mota ina kiveyabidi o kai gufa golago-ladi inayudi, aga keke ina alika. Nimadi inasena toveoga vovodiya ke ina veiwaka.” †

*Yeisu gilaka gabameya.*

*Luk 24:50-53; Gug 1:9-11*

<sup>19</sup> Ada Kauveya Yeisu yana vona wagaidiya giavaina, Yaubada gisilakaina gabameya† ada Yaubada aiyatagine givetogana.

---

† **16:15** Gug 1:8    † **16:16** Gug 2:38, 16:31-33    † **16:18** Gug 2:4, 8:7, 28:3-6, Luk 10:19    † **16:19** Gug 1:9, Efes 1:20

<sup>20</sup> Ada tonogalayavo inau ada valeya iwakana ilumamalena fafali moyaidi wagaidiya. Ada Kauveya badi nodi igugai ke iyaiyaya ebameyasi-dobodobo gifaifaisewadi badi nimadiya, e ada kaliva iitadi ke nuwadi gimalina vaita yadi laumamala ani vona velemonoena.<sup>†</sup>

---

<sup>†</sup> **16:20** Gug 14:3, Ibel 2:3-4

**Yaubada Yana Veyavo Anawai Evaguna**  
**The New Testament in the Bwaidoka language of**  
**Papua New Guinea**  
**Nupela Testamen long tok ples Bwaidoka long Niugini**  
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-12-01

---

PDF generated using Haiola and XeLaTeX on 1 Dec 2025 from source files dated 1 Dec 2025

b5406fa0-0156-5dfd-bdb9-797516d75cf2